





u

Ex Bibliotheca
majori Coll. Rom.
Societ. Jesu

13
6
22

FRANCI- sci Sanctij Bro

CENSIS IN INCLYTA

Salmanticensi Academia Rhetorice professoris de arte dicendi liber unus denuò auctus & emendatus.



Cui accessit

IN ARTEM POETICAM


Horatij per eundem autorem brevis elucidatio.



SALMANTICAE

Excudebat Mathias Gastius.

1558



AMPLISSIMO

DOCTORVM AC MAGI=

gistorum ordini Salmanticēsis Aca-
demiae Franciscus Sanctius Rhe-
torices professor,

S. P. D.



V M Q V A E S V=

prauires dicendi meas po-
sita sunt conor attingere (il-
lustres uiri) temeritatis cri-
mine non dubium est quin
ueniā incusandus: quod idē
si non fecero, ingrati animi
notam non sine probro maximo reportabo. Nam
uos meis nugis sollicitare rebus presertim arduis
uacantes, durum admodum omnibus fortasse ui-
deatur: pro tot in me rursus collatis beneficijs nul-
las omnino gratias agere, id uerò non modò inhu-
manum, sed penè dixerim impium semper existi-
maui. Malui deniq; (cū grati animi utcūq; in-
diciū sim professus) desiderari ab omnibus mode-
stiam meam, quā si id non praestitissem, accepti
beneficij confessionē. Quod etiam ut libentiū au-

A 2

derem,

derem, autor mihi Cicero fuit, qui ab ipsis Natu-
ræ legibus admonitus, hæc scripsit diuinitus: Ne-
mo gratiarum immemor est gratus inuentus. Ago
igitur uobis immortales gratias, uirtutum omnium
antistites, quod me in patrociniū uestrum suscep-
istis, & ut Salmantinam iuuentutem in rhetoricis
instituerem, ex qua mediocritate in tantum gradum
posuistis! Quod mihi iniunctum munus ut expedi-
tius obire possem, artē siue methodum quandam non
composui, sed ex antiquis probatissimisq; Græcis &
Latinis autoribus concinnaui, quam uester, & ad
uestros, cui potius, quam uobis dicarem, inueni ne-
minē. Idq; non ut gratiam referrem (priuatorum id
enim est mutuis inter sese beneficijs decertatum)
neque enim aut uester splendor beneficiorum desi-
derat remunerationem, aut mea tenuitas ullam
suppeditat retribuendi facultatem. Sed eo tantum
animo hoc sum ausus moliri, ut meam erga uos gra-
tam memoriam ac potius pietatem testatiorem
relinquerem. Deus Opt. Max. uos quam longissime
seruet incolumes, consiliaq; uestra sic regat, ut ad
demerenda bona ingenia, æternamq; ipsius requiem
consequendam præbeat facultatem. Valete.

Rhe-



ON putauit egregius ille
pictor Zcuxis, cum Helenam
Crotoniatis depingendam sus-
ciperet, omnia quæ quære-
ret ad uenustatē uno in corpo-
re se reperire posse, quod in-
telligeret, nihil esse ab omni
parte beatum, ut Flaccus inquit. Quinq; itaq; uir-
gines ē multis forma præstantibus elegit, ex qui-
bus omnibus perfectē unam Helenam effingeret.
Ego autem cum aliquid Helena formosius depin-
gere instituissem: optimos quosque dicendi magi-
stros proposui sequendos, ad quorum exemplar
penicillum meum moderarer. Sed quia quisque
suam uiam institit, ex Cicerone, Quintiliano, Her-
mogene, & Aristotele quandam relictis opinioni-
bus decerpſi methodum, quæ meritō dicendi ars
posset appellari. Huiusmodi enim aliquam, cum
multas euoluerim, mihi uidere non contigit hæc-
tenus. Multis quid sentiret aperuit nobis Quintilia-
nus. Cicero hanc rem uariē tractauit, nec paucio-
ribus. In partitionibus succinctus magis quàm ut

addiscentibus sit aptus. Cornificij quæ ad Herennium extat omnium, quas legerim, accedit ad artē proximè. Sed sunt in illa multa uel mutanda uel omnino tollenda. Quare aliam uiam aggrediendam putauī, ut sine temporis iactura, qua nihil pretiosius, auditores meos instituerem. Et ut re=ctius instituti mei constet ratio, illud omnes uelim admonitos, me nō compendium (quid enim peius, cū id fiat maximo auditorum dispendio?) sed artem scribere, qua quiuis possit & in poetarum & oratorum scriptis nō sine laude diuagari: & quæ ab alijs de rhetorica sunt præcepta, non ignorare. Non tamen hīc minutula quædam sumus cōplexi, quæ Progymnasmata dicūtur, hæc enim pulchrè tradūtur ab Aphthonio, in quo elucidando aliquā superioribus diebus opellam nauauimus. Illud tamen affirmo: qui diligenter nostram artem cuoluerit, eum de quauis re proposita facilè dicturum, nedum de Progymnasmatibus. Non tamen perfectū polliceor oratorem, id nanque non solis & nudis præceptis constat: sed uaria lectione, maxima exercitatione, egregiaq; natura. Medio quodam ordine procedimus, ex antiquis Græcis Latinisq; rhetoribus præcipua quæq; colligentes, inq; suum ordinem collocantes. Agimus enim primò de In=

uentione,

uentione, natura ita postulante: prius enim inue-
 nicndæ sunt res, quàm collocandæ, aut ornandæ.
 Deinde de Dispositione, siue iudicio, ubi etiam de
 memoria, quæ maximè dispositiõe iuuatur. Quod
 uerò nostri fuit laboris et diligentiae, singulis præ-
 ceptis selecta ex probatissimis autoribus exempla
 subiunximus. Quod autem ad Elocutionem atti-
 net, Audomari Talei ordo adco ipsi naturæ re-
 rum consentit, ut si alium quærere conarer, peio-
 rem inuenissim. Reperto enim quod est optimum
 (inquit Fabius) qui quærat aliud, peius inuenit. Il-
 lius igitur ordinem in omnibus ferè sum secutus,
 paucis uel mutatis, uel omnino sublati, nullius ad-
 dictus iurare in uerba magistri, ut Flaccus inquit.
 Scio mihi cum Talei sectatoribus fore paratas li-
 tes, quòd ille solam Elocutionē Oratoris esse pro-
 priam putat. Inuentionem & Dispositionem so-
 lius Dialectici. Quibus ego in præsentia re-
 spondeo, me in hoc libello antiquorū præ-
 cepta in ordinem collegisse, & ex il-
 lorum pratis meum hoc sertum
 complicasse, alibi fortasse
 quid de hac re sen-
 tiam, disputa-
 turum.

FERDINANDI SANCTII

Brocensis ad Lectorem

Carmen.

*Si tibi pennigeras amor est captare uolucres,
Continuo gressus frondea in arua moues.
Siue iuuat tremula deprendere arundine pisces,
Vitrea piscosæ flumina quæris aquæ.
Scis ab Erythræo pretiosas littore conchas,
Atq; è Panchæo germine thura legi.
Sic tibi facundas si mens est fundere uoces,
Quæ Fabij sapiant, & Ciceronis opus:
Huc oculus, Lector, huc dirige mentis acumen,
Perfectæ hîc nosces dogmata Rhetorices.
Hæc fratris Sanctij, typis tibi cusa secundis,
Pagina Nestorcas suppeditabit opes.*

FRANCISCI

SANCTI BROENCIS IN

inclita Salmanticensi Academia Rhe
torices professoris de arte dicen
di, liber unus.



Hetorica est bene dicendi
scientia. Cuius partes sunt
tres. Inuētio, Dispositio, Elo
cutio. Nam cum omnis uis
oratoris sit in rebus & uer
bis: res & uerba inuenienda
sunt, & collocanda. Proprie
autem in rebus inuenire, in uerbis cloqui dicitur.
Collocatio quoque rerum appellatur dispositio,
in uerbis uerò numerus, siue cōcinnitas, quæ pars
elocutionis est. Vox, motus, uultus, atque omnis
actio eloquendi comes est: nisi malis histrionis es
se propriam. Memoria harum omnium custos
artium omnium est communis. Partes igitur, quas
suscepimus tractandas, hoc ordine collocabūtur.

Prima erit inuētio, in qua rationes exquirun
tur ad probandū. Secunda dispositio, siue iudiciū,

DE ARTE

ubi de collocatione argumentorum, & orationis partibus, atq; memoria disputabimus. Tertia elocutio, quæ tropos, & figuras, ceteraq; ornamenta, actionem & pronuntiationem continebit.

DE INVENTIONE.

Inventio est ratio argumenti excogitandi ad explicandam quæstionem.

Argumentum est probatio quæstionis.

Quæstio est id, de quo agitur. Cuius duæ sunt partes: Infinita, quæ Græcè thesis, Latine propositum, siue cōsultatio solet appellari: quādo sine proprijs personis, locis, aut temporibus res tractantur, ut An expediat Christianis bellum gerere. Definita, quæ Græcè hypothesis, Latine dicitur controuersia, siue causa: cū appositis proprijs personis, locis, & tēporibus quæstiones disquiruntur, ut an ducēda sit uxor Catoni. Hanc solam quæstionē in tres partes antiqui diuiserūt, genera causarū appellantes. Nā cū de uitijs aut uirtutibus erat dicendū, exornationis siue laudis genus appellabāt: cū de re utili aut inutili, suaseriū seu deliberationis: cū uerò de equitate, iudiciale. Generalem illam quæstionem dialecticis concesserunt. Quos tamen
Cice=

Ticero reprehendit, cum utramq; quæstionem ab Orat. 2
utroq; artifice tractari confirmat. Cui etiam cau-
sæ in tria genera diuisio non probatur, cum
innumerabilia esse arbitretur. Hæc tamē innume-
rabilia relinquit exercitationi, tria q; illa potiora
exornationis, suasionis, et iudicii prosequitur: quia
cum tradita sint cuiusq; artis difficillima, reliqua,
quia facilia aut similia, nihil erit periculi si præ-
termittantur. Vt enim in pictura, qui hominis spe-
ciẽ pingere perdidicerit, poterit cuiusuis uel for-
mæ uel ætatis, etiam si non didicerit, pingere: ita
qui primarum & certarum rerum genera ipsa
sunt adepti, reliqua faciliẽ persequentur. Nunc igi-
tur his tribus præcipuis generibus cõmunia pro-
feramus argumenta.

Omnis res argumentando confirmatur aut ex
eo quod personis, aut ex eo quod negotijs est attri-
butum, aut ex eo quod utrisq;. Personarum attri-
buta sunt: natio, patria, genus, sexus, nomen, ætas,
dignitas siue conditio, educatio, habitus, affectio,
studia, uictus, bona animi, bona corporis, bona ex-
terna, facta, casus, orationes, mors.

Natio admonet quod sit cuiq; genti peculiare
ingeniũ, aut mores proprii. Non enim idẽ proba-
bile est in Barbaro, Italico, & Græco. Cicci. Iudices Philip. 5
legit

D E A R T E

Pro Syl. legit Græcos, ô confessum iudicium præclarum.
Idem. Licet ipsi nos amemus, tamen neque callidi-
tate Pœnos, neq; artibus Græcos superamus.

Patriæ tractandæ eadem erit ratio. multum
enim refert sitne aliquis Colchus, an Assyrius, The-
bis nutritus, an Argis. Hic consideramus, patriæ
ne claritati responderit, an humilitatē superauerit.

Carm. 1 Genus, quibus quis maioribus sit prognatus, ostē-
dit. Horat. Mœcenas atavis ædite regibus.

Sexus etiam uaria suppeditat argumenta. Faci-
nus enim magnū plus laudis habet in fœmina quā
in uiro: & ueneficiū in fœmina, furtū in uiro cre-
dibilius. Vir. Variū & mutabile semper fœmina.

Ænc. 4 Nomen diuiditur in notationē, & coniungata.
Notatio, siue nota, siue etymologia est propria no-
minis interpretatio. ut non est consul qui patriæ
non prospicit: consul enim à consulendo dicitur.

Sic Augustus de eo qui locum paternæ sepulturæ
arabat, dixit: hoc est uerè patrem colere. Cicero
multa iocatur in Verris nomen. Coniungata dicun-
tur, quæ ab eodem principio orta uariè commu-
tantur, ut iustus, iustitia, iustè. Terent. Homo sum,
humani à me nihil alienum puto. Ouid. Quis ma-
gno melius succedet Achilli, quàm per quem ma-
gnus Danaïs successit Achilles?

In Verr.

Heaut.

Met. 13

A E t a

Aetatis cuiusq; notandi sunt tibi mores, quia aliud alijs annis magis conuenit. locus hic ad multa utilis in affectibus praecipue laudem obtinet. Vir. AENE. 1
 Infelix puer, atq; impar congressus Achilli. Idem. AENE. 12
 Dauni miserere senectae. & . Miserere parentis lō gaudi. & . canitiem multo deformat puluere.

Dignitas siue conditio. Clarus, an obscurus, magistratus, an priuatus, ciuis an peregrinus, liber an seruus. Terent. Seruum hominē causam orare le Phor. ges non sinunt. Idem. An paulum est uirginē uitia Eunuc. re ciuē? Virg. Et nostris illuserit aduena regnis? AENE. 4
 Idē. Exulibus ne datur ducenda Lauinia Teucris? AENE. 7

Educationis consideratio in laude praecipue et coniecturis copiosam materiā praebet. docet enim quomodo, quibus in locis, à quibus, & cum quibus fuerit educatus. Cic. in Antonium. Quī autem tibi uenit in mentem, redigere in memoriā nostrā, te domi P. Lentuli esse educatum? an uerebare, ne non putaremus natura te potuisse tam improbum euadere, nisi accessisset etiam disciplina? Terent. Educta ita uti te illa q; dignum est. Virg. Natos ad flumina primum deferimus, saeuoq; gelu duramus & undis. Huc etiam referuntur sodalitia: nam ex illis arguitur qualis sit quisq;. Virg. Hectoris hic magni fuerat comes, Hectora circum

Et

D E A R T E

Et lituo pugnans insignis obibat & hasta: Postquā illum uictor uita spoliavit Achilles, Dardanio Aeneae sese fortissimus heros Addiderat socium, non inferiora secutus.

AENE. 9

Habitus hīc pro consuetudine siue confirmata exercitatione capitur. Virgil. Venatu inuigilant pueri, syluasq; fatigant: Flectere ludus equos, & spicula tendere cornu. At patiens operum paruōq; assueta iuuentus, Aut rastris terram domat, aut quatit oppida bello. &c.

Affectio est animi aut corporis ex tempore aliqua de causa commutatio. ut letitia, cupiditas, metus, molestia, morbus, debilitas.

And.

Studia uocamus ad quæ quisq; natura propensius est. Terent. Quod pleriq; omnes faciunt adolescentuli, ut animum ad aliquod studium adiungant: aut equos alere, aut canes ad uenandum, aut ad philosophos: horum ille nihil egregiè præter cætera studebat, & tamen omnia hæc mediocriter. Virg. Bellis assuetus Opheltis.

AENE. 9

Victus, in quo etiam uestitum intelligimus, spectatur luxuriosus sit, an frugi, sordidus an splendidus. Terent. Lana ac tela uictum queritans. Cicerō. Qua in re prætereo illud, quod mihi maximo argumēto ad huius innocentiam esse poterat,

And.

Pro Rosc.

in

in uictu arido, in hac horrida incultaq; uita maleficia igni non solere.

Bona animi sunt uirtutes, quarum semper uera laus. Hic uidendum crit quid sapiēter is quem laudes, quid liberaliter, quid fortiter, quid iustè, quid magnificè, quid piè, quid gratè, quid humaniter, quid deniq; cum aliqua uirtute aut fecerit aut tulerit. Virgilius. Rex erat Aeneas nobis: AENE. 1
quo iustior alter Neque pietate fuit, nec bello maior & armis.

Bona corporis, ut forma, ualetudo, uires, dignitas oris. Virgi. Filius huic iuxta Lausus quo AENE. 7
pulchrior alter Non fuit, excepto Laurentis corpore Turni. Idem. Restitit Aeneas claraq; in luce resulsit, Os humerosq; Deo similis. AENE. 1

Bona externa siue Fortunæ, sunt opes, diuitiæ, liberi, coniuges, propinqui, amici. Atque hæc (inquit Comicus) perinde sunt, ut illius animus qui HEAUT.
ea possidet: qui uti scit, ei bona: illi qui non utitur rectè, mala. Virg. Ditissimus agri.

Facta siue effecta, casus, euentus, euenta, dicta, orationes, consilia eodem tendunt, & tribus temporibus tractantur, ut quid fecerit, dixerit, quid illi acciderit: quid faciat, dicat, quid illi accidat: quid sit factururus, aut dicturus, quidue

quidue illi casurum. Huc referuntur oracula, miracula, præsagia quæ ante natiuitatem, uel in uita, uel post mortem aliquid nunciauerunt. ex hoc loco Cicero pro Marcello Casarem extollit: & aduersarios Antonium, Pisonem, Catilinam mirè dilacerat, cùm eorum antè actam uitam, dicta, facta, consilia latè prosequitur.

Mors etiam suam laudem aut uituperationem habet. Vir. Hoc tamè infelix miserâ solabere mortē: AEneæ magni dextra cadis. Huc referuntur decreta publica post mortē, statuae, diuini honores.

AEne. 10

Negotiorum quæstiones hæ ferè solent esse, magnum, periculosum, possibile, facile, necessarium, utile, iustum, præclarum, honestum, & contrà. Hæ uerò quæstiones & si quæ sunt aliæ, his rerum attributis faciliè probantur aut explicantur, persona, loco, modo, tempore, causis.

Euniv.

Saty. 11

Eunuc.

Persona hîc aliter quàm in superioribus consideratur, nam illic ut res subiecta, hîc ut attributum intelligitur. Terent. Non tã ipso quidē dono, quàm abste datum esse, id uerò seriò triumphat. Iuuenal. Atticus eximiè si cœnat, lautus habetur, Si Rutilus, demens. Terent. Nam si ego digna hac contumelia sum maximè, at tu indignus qui faceres tamen.

LOCUS

Locus consideratur in quo res gesta sit, ex
 opportunitate quam uideatur aliquis habuisse ad
 negotium administrandum: cæque opportunitas
 queritur ex magnitudine, interuallo, longinqua-
 te, propinquitate, solitudine, celebritate, natura
 ipsius loci, & uicinitate totius regionis. Tum
 etiam queritur, sacer ne sit, an prophanus, publi-
 cus, an priuatus, alienus an ipsius de quo agitur, de
 sertus, an cultus, munitus, an neglectus, cæpestris,
 an montanus, siccus, an aquosus. Argumenta hinc
 sumuntur egregia ad affectus mouendos. Virg. AEne. 2
 Ter circum Iliacos reptauerat Hectora muros.
 Idem. Cum uitam in syluis, inter deserta ferarum AEne. 3
 lustra, domosq; traho. Idem. Et dulces moriens re AEne. 10
 miniscitur Argos. Idem. Inter sacra deum, noctur Geor. 4
 naq; Orgia Bacchi discerptum latos iuuenē spar-
 sere per agros. Terent. Ex AEthiopia usque est Eunuc.
 hæc. Cic. Ut tibi necesse fuerit in conspectu popu- Philip. 2
 li Romani uomere.

Tempus, ut præteritum, instans, futurum. In
 præterito eleuamus ea quæ propter uetustatem
 obsoleuerunt, ut incredibilia uideantur, & iam in
 fabularum numerum reponantur, aut laudamus
 iam diu gesta & à memoria nostra remota, quæ
 tamen fidem faciant, quòd uerè tradita sint: &

B quæ

quæ nuper sunt gesta, quæ scire pleriq; possint. In
 presenti & futuro tractantur quæ maximè fiât,
 ut quid serius, quid ocysus fiat, aut sit futurũ. Item
 communia temporis cuiusq; sunt longinquitas, &
 breuitas, ut potuerint magnitudo aut multitudo
 negotiorum in eo transigi tempore. Tẽporis par
 tes sunt annus, mensis, dies, nox, hora, nunc, olim,
 noctu, interdix. &c. Cicero de Antonio. Ipse inte
 rea decem & septẽ dies (ut digestio potiũs, quàm
 declamatio uidetur) de me in Tyburtino Scipio
 nis declamauit. Mouetur & affectus ex hoc lo
 lo. Vir . Septẽ illũ totos perhibent ex ordine men
 ses rupe sub aëria deserti ad Strimonis undã fle
 uisse. Idẽ. Tertia iam lunæ se cornua lumine cõ
 plēt, cum uitã in syluis. &c. Idẽ de Palinuro nau
 frago. Tres Notus hybernæ immensa per equo
 ra noctes uexit me uiolētus aqua, uix lumine quar
 to prospexi Italiã. Huc refer occasiõem, quæ est
 pars tẽporis, habēs in se alicuius rei idoneã faciẽ
 di, aut nõ faciẽdi opportunitatẽ. ut ludi, dies fe
 stus, bellũ, mēsis, uindemia, calor, frigus, nuptiæ, sa
 crificiũ, funus, conuiuiũ, somnus. Teret. In tẽpore
 ad eam ueni, quod rerum omnium est primũ. Idẽ.
 Ut in ipso articulo oppressit! & totus ille locus.
 Occasiõẽ describit Virgilius in AEnecæ et Didũs
 uenat

Philip. 5.

Geor. 4

AEne. 3

AEne. 6

Heaut.

Adelph.

AEne. 4

uentione, ex illo loco. Venatū Aeneas, unaq; mi
ferrima Dido. &c. et in ligatiōe Protei. 4. Geor.

Modus est in quo, quemadmodū factū aliquid
sit, quærimus, ut prudenter, an imprudenter, clā,
palā, dolo, manifestè, occultè. Vir. Nō ego te uidi Eclog. 3
Damonis pessime caprū excipere insidijs? Idē de AEne. 8
crudelitate Mezentij: Mortua quinetiā iungebat
corpora uiuis, Cōponēs manibusq; manus, atq; ori
bus ora (tormēti genus) & sanie taboq; fluentes
cōplexu in misero, lōga sic morte necabat. Idē de AEne. 3
Polyphemo: Trunca manū pinus regit et uestigia
firmat, Lanigeræ comitātur oues, ea sola uolup=
tas, Solamēq; mali de collo fistula pēdet. Cic. Faci Verr. 7
nus estuincere ciuē Romanū, scelus uerberare, pro
pe parricidiū necare, quid dicā in crucē tollere?

Causa est ea quæ induxit ad factum cōmodo=
rum spe, aut incōmodorum euitatione. Cumq; ni=
hil sine causa fiat, magnus est usus huius argumen
ti: quare latius aliquantō locus explicabitur. Quæ
cunq; homines efficiunt (ut in rhetoricis ad Theo
dectem inquit Arist.) aut efficiūt per seipsos, aut Lib. 1
non, si per se, aut ex consuetudine, aut propter ap
petitum: qui aut est rationis compos, aut expers
rationis, huiusq; duæ sunt partes ira, et cupiditas.
Rursus cū per se homines nō faciunt, duobus id

D E A R T E

contingit modis, aut enim fortuna interueniente aut necessitate, quæ aut externa ui, aut insita naturaque ipsa impellente homines ad efficiendum cogit. Septem igitur sunt causæ humanarum actionum. Mos, siue consuetudo: ratio, siue consilium: ira: cupiditas: fortuna: uis, seu necessitas, seu uiolentia: natura.

Lib. 7. ca.
10. Ethic.

Consuetudine facere homines dicuntur quæcunq; agunt, quia illa sæpenumero egerunt. Phormio apud Teren. Iam factum est periculum, iã pedum uisa est uia. Consuetudo est penè altera natura, ut testatur Euenus apud Arist. Vnde est illud uitæ utilissimum Pythagoræ præceptum: Optima uiuendi ratio est eligenda, eam iucundam consuetudo reddet.

Eunu.

Pro Mar=

Consilium siue ratio est causa, quæ præmissa de liberatione rem efficit. Hæc potissima causa est, utpote quæ finem semper certum intueatur. Quare in rebus bonis laudem & præmiũ meretur, in malis pœnam & uituperationem. Hinc coniectamur qualis sit cuiusq; animus & uoluntas. Hinc exorditur Cicero Verrinas actiones, & Philippias, & pro Rabirio perduell. Terẽ. Prudēs, sciēs, uiuus, uidensq; pereō. Cice. Prudens, & sciens ad interitum ruebam.

Propter

Propter iram fieri dicuntur ea, quæ homines faciunt, ut pœnas infligant ijs à quibus sunt læsi. Virg. Furijs accensus & ira. Terent. Vix sum cōpos animi, ita ardeo iracundia.

AEnc. 12

Adelph.

Cupiditate aut libidine facimus ea, quæ speciē præ se ferunt suauitatis, & aut iucunda sunt, aut iudentur. Virg. Impius ante aras, atque auri cæcus amore, Clam ferro incautum superat. Terent. Eun. Hanc tu mihi uel ui, uel clam, uel precario fac tradas: mea nihil refert, dum potiar modò.

AEnc. 1

Eun.

Fortuna est causa inopinati euentus. Hæc causa nullum certum finem habet propositum: ideoq; semper cōsilio aduersatur. Vnde rectè Aristoteles in magnis Ethicis: Vbi plurimū rationis ac intellectus, ibi fortunæ minimum: ac rursus ubi fortunæ plurimum, ibi minimum est intellectus. Cui consōnat Iuuenalis.

lib. 2. cap. 8

Nullum numen abest, si sit prudentia: sed te Nos facimus fortuna Deam cæloq; locamus.

Saty. 10

Huc refertur & imprudētia: unde illa Ciceronis ProLigar. deprecatio: Ignosce pater, errauit, lapsus est, non putauit, si unquam post hac. Et paulò post: Erraui, temerè feci, pœnitet, ad clementiam tuam confugio, delicti ueniam peto, ut ignoscas oro.

Neccēssitas est cū ui diuina, uel humana, uel

alia quauis externa cogimur ad effectū . Diuina,
 AEne. 10 *ut illud Virgilij. Stat sua cuiq; dies: breue & irre*
 ProLigar. *parabile tempus omnibus est uitæ. Cice. Ac mihi*

quidem, si propriū & uerum nomen nostri mali
queratur, fatalis quædā calamitas incidisse uide-
tur, & improvidas hominū mētes occupauisse, ut
nemo mirari debeat humana cōsilia diuina neces-
sitate esse superata. Huc pertinet exordiū secūde
Philippicæ: Quonā meo fato. etc. Humana neces-
sitas, ut metus minatæ mortis, aut fames, et eiusmodi

alia. Vir. Victus amore tui, cognato sāguine uictus
 AEne. 12 *coniugis et mæstæ lachrymis, uincta omnia rupi.*

Natura fieri dicuntur ea, quorum causa in ip-
sis constituta est, ac certum quendam ordinem ser-
uant, ut aut semper, aut plerumq; eodem pacto

fiant. Vt homines natura scire desiderāt. Horat.
 Lib. 2. Sat. 1 *Castor gaudet equis, ouo prognatus eodem*

Pugnis: quot capitū uiuūt, totidē studiorū millia.

Persius. Mille hominum species & rerū discolor
 Saty. 5 *usus, Velle suum cuiq; est, nec uoto uiuitur uno.*

Sunt & aliæ causæ, sine quibus effici aliquid
non potest, ut materia, & instrumenta, sed natu-
rā efficiendi non habent. à materia laudatur solis
 Meta. 2 *domus apud Ouidium. Instrumenta uidentur illa*

apud Terentium. Persuasit nox, amor, uinū, ado-
 Adelph. *lescena*

lescentia. Atq; hæc de attributis rerū. In quibus si quis dubitet cur causas enumerauerimus, cum potius ad personas spectare uideantur (præcipuè cū iam in personæ attributis naturam posuerimus et fortunam, & consiliū, et reliqua) respondeo aliud esse attributa enumerare in persona, seu illam ab attributis laudare, ut si dicas Cicero diues est, liber, prudens, iracūdus: aliud si dicas, quia diues est, aut liber, qui pollet consilio, et ardet iracūdia, hoc uel illud negotium peractum est. Itaq; rerum attributa personis adiunguntur tāquam subiectis, et contra personæ ipsæ (ut monuimus) cum suis attributis adherent aliquando ipsis negotijs.

Sunt præterea alia argumentorū genera quæ dicuntur sine arte, ut testimonia. Quæ personis & negotijs conueniunt. Testimonia uerò aut sunt diuina ut oracula, miracula, præfagia, diuina respsōsa, deniq; quicquid ex sacra scriptura licebit allegare. Humana testimonia sunt leges, testes, pacta, tormenta, iusiurandum, præiudicia, rumores, tabulæ, prouerbia, sententiæ philosophorum, poetarum, oratorum. & cum iubemus contradicentem experiri. Terentius. Fac periculum in literis, fac Eunū. in palestra, in musicis. Hoc argumento Pythagorei omnem quæstionem confirmabant respsodere.

D E A R T E

soliti: Ipse dixit. Ipse autem erat Pythagoras. Haec
etenus de argumentis ad quancunq; quaestionem
probandam accommodatis egimus: nunc ad specia
lia transeamus.

D E I N V E N T I O N E speciali.

IN quolibet genere causarum tres inueniuntur
status siue cōstitutiones, an sit, quid sit, quale sit.
Hoc est: cōiectura, finitio, qualitas. ut. Occidisti ho
minē: nō occidi: hinc nascitur cōiectura, an occide
rit. Sustulisti pecunias ex aede sacra, es igitur sacri
legus: sustuli quidem, sed priuatas: non sum sacrile
gus, sed fur. Hinc surgit finitio, quid sit sacrilegiū,
quid furtum. Occidisti hominem. Occidi, sed latro
nem, iure igitur occidi. De qualitate hīc agendum
est an iure occiderit.

intentio, ratio
de pulsione
firmamen
tum
Sed ut planius haec enodentur, intelligendū est,
ex intentione, & depulsione nasci quaestionē, siue
cōstitutionem: ex ratione & firmamento, iudica
tionē, quam Graeci crinomenon dicunt. Vt sit haec
intentio: Non iure occidisti matrē Orestes. Depul
sio: Iure occidi. Hinc iam oritur quaestio, An iure
occiderit. Sed nisi reus rationem afferat, nihil in
causa

causa controuersiae relinquitur. Ratio igitur est: illa enim prius patrem meum interfecerat. Contra rationem adducitur ab aduersario firmamentum, quod & infirmatio rationis dicitur. sic: Non abste filio matrem indemnata necari oportuit. Ex his liquet crimen non: iure ne Orestes in patris uindictam matrem interfecerit. Huc omnia sunt argumenta dirigenda. In causa uero coniecturali, quia factum negatur, neq; ratio est neq; firmamentum, quare ex intentione & depulsione nascitur quaestio & iudicatio simul. ut, Occidisti, non occidi, an occiderit est quaestio & iudicatio.

L O C I C O N I E C T V R A E.

Est igitur coniecturalis constitutio, cum factum ne sit aliquid, aut fiat, aut futurum sit, queritur. Huius constitutionis capita haec enumerantur ab Hermogene: Praescriptio: petitio: uoluntas: potestas: comprehensio: absolutio: repulsio: transpositio criminis, siue color: inuersio: qualitas communis.

Praescriptio, siue recusatio est locus quo totam causam a nobis reijcere conamur. Haec si lege, aut firma consuetudine, aut iudicatis nititur: non locus est, sed status integer, quem actionis siue translationis

nis appellant. Præscriptio igitur fit quatuor modis. Primo, ab eo quod deficit. ut, prodigus quidā accusatur quòd patrem occiderit, quia pater nūquā apparet: petit prodigus ostendi an mortuus sit pater. Secūdo, ab eo quod excedit. ut decē iuuenes coniurarūt, ne uxores ducerēt, male uitæ accusatur. Tertio, quòd nō oportet propter aliorū facta dānari. ut, uir strenuus, cui hostes statuam erexerūt, proditiōis accersitur. Quarto, à tempore, ut timidi cuiusdā filius uir strenuus in prælijs euasit, timidus uxore adulterij reā agit: dicit mulier, multis trāsactis annis hoc crimine accusari nō cōuenire. Cic. Quid ergo, cū res agebatur, nemo in me dixit, id tot annis post tu es inuentus qui diceres?

Phil. 2

Pro Cælio.

Petitio est cū testes, aut signa petimus. Si sunt testes, eorum auctoritatem per attributa personarū eleuabimus. Et signis, quæ corrūpi nō possunt, credi oportere dicemus. Cice. Equidem uos abducam à testibus, neque huius iudicij ueritatē, quæ mutari nullo modo potest, in uoluntate testiū collocari sinam, quæ facillimè effingi, nullo negotio flecti, ac detorqueri potest. Argumentis agemus: signis omni luce clarioribus crimina refellimus: res cum re, causa cum causa, ratio cum ratione pugnabit. Si non sunt testes, illos per circumstantias

stantias petemus, et indignum dicemus quempiam sine teste damnari. Cic. Cui deniq; commisit? quo adiutore usus est? quo socio? quo conscio? cui tantū facinus, cui se, cui salutē suam credidit? Si utrinq; sunt testes, aut signa: testibus testes, & signa signis opponemus. Huc quæstiones, præiudicia, rumores, tabulæ, iusiurandum accumulatur.

Voluntas quæritur ex uita, & causa: uita cuiusq; per attributa personarū exquiritur. Causa est ea quæ induxit ad malè agendum commodorum spe, aut incommodorum euitatione. Expende rerum attributa, ubi de causis egimus.

Potestas, siue possibile, cui etiam facile subijcimus, probatur per attributa personarū, præcipuè à rebus externis uel fortunæ, ut opibus, diuitijs, amicis. Et per attributa rerū, ut locū, tēpus, spatium, occasionē, spem perficiendi aut celādi. Impunitas quoq; probat possibile. Cice. Quid, quod caput audaciæ est, iudices, quis ignorat maximā ille cerebrā esse peccandi impunitatis spē? Et ars. Virg. Nō ignara mali miseris succurrere disco. Et quæ sunt penes nos. Vir. Sunt mihi bis septē præstāti corpore Nymphæ. Et quæ penes nostros. Teren. Tuus est nunc Chremes, facturum quæ uoles scio esse omnia. Et par, cū ex re pari parō colligimus.

ibidem.

Pro Mil.

AEne. 1

AEne. 1

And.

- AEne.10** *mus. Virg. Numina nulla premunt, mortali urge mur ab hoste mortales: totidē nobis animāq; manūsq; . Et minus: cū ex minoribus maiora com-*
- Phor.** *monstrantur, idq; semper affirmādo. Terēt. Cuius tu fidem in pecunia perspexeris, uerere uerba ei*
- AEne.1** *credere? Virg. O passi grauiora, dabit Deus his quoq; finem. Et maius, cū ex maioribus disputā-*
- Pro Mar=** *tur minora, sed negādo. Cic. Tantum abes à per-*
- cello.** *fectione maximorum operum, ut fundamenta,*
- Phor.** *quæ cogitas, nondum ieceris. Terent. Alios tuam*
- Phor.** *rem magis credidisti, quā te animaduersuros? Idē. Cū hoc non possum, illud minus possem.*

Comprehensio, siue ab initio ad finem est signū circumstantijs implicitum, per quod res arguitur certioribus argumētis, & quasi firma suspitione. Signa hæc ducūtur à multis personarum attributis, ut à natione, sexu, dignitate, à factis & dictis. Itē à loco, tempore, modo, causis. Terēt. hūc locum egregiē tractauit in Andr. in Scena quæ incipit:

- Phil.3** *Di boni, boni quid porto. Cic. His autoribus, & ducibus, dijs iuuantibus, nobis uigilātibus, & multū in posterū prouidentibus, populo Romano cōsentiente erimus profectò liberi breui tempore.*
- Absolutio est quando defensor licuisse sibi id facere ostendit, quo aduersarius utitur pro signo.*
ut qui=

ut quidam sepeliens cadauer inuentus est: accusatur: licere dicet hominem sepelire. Terent. Quid feci, quid commerui, aut peccaui pater? Quæ se se uoluit in ignem iniicere prohibui, seruauit. And.

Repulsio semper absolutioni cōtraria est, quare si accusator illa: reus hac utetur, aut contrā. Tractari solct per inficiationem & obsistentiam. Inficiatio est absolutionis plena negatio. ut non licet sepelire. Obsistentia est cū aliqua absolutio nis circumstantia negatur, ut. Si licuisset, non tibi, aut isto modo, aut loco, aut tempore.

Transpositio criminis siue color est quando id quod diximus, aut fecimus, alia nos causa dixisse aut fecisse ostendimus, & ueluti colore fucamus. Est autem locus cōtra comprehensionem, confirmatur ab affectionibus, à dictis, à factis, ab scripto & sententia, cū quæ scripsimus, alio nos animo scripsisse contendimus. Cicero in Pisonem aliter uersiculum illum (Cædant arma togæ) interpretatur, quàm uulgo solebat intelligi.

Inuersio est quando te iisdem defendis argumentis, quibus te configit aduersarius. ut, sepeliebas hominem in sylua, interfecisti igitur: imò si interfecissem, nō essem occupatus in sepeliendo. Martialis.

Egi, Sexte, tuam pactus duo millia causam:

Misisti

Misisti nummos quot mihi mille: quid est?
 Narrasti nihil, inquis, & à te prodita causa est.

Tanto plus debes, Sexte, quòd crubui.

Hic locus semper inuertit comprehensionem, & adeò labefactat aduersarium, ut cum cum solvere non bene possit, ad prouidentiam diuinam confugiat, Deum scilicet ita uoluisse, ut tantum scelus non maneret impune, aut imprudētiam illius qui fecit, quòd timore, aut uino præpeditus, nequiret quod utile foret perpendere.

Qualitas communis est uelut epilogus confirmata suspitione. Qualitas dicitur quia auget peccati atrocitatē, uel cōquestione misericordiā captat. Cōmunis dicitur quia non solū cōiecturæ sed omni conuenit quæstioni. & quia quæ in hūc uel illū dicuntur, ad uniuersos eiusdem criminis reos accommodari possunt. Percurre partes utilis, & honesti. Vtile est quod nō sua ui & natura, sed propter aliquod emolumentū & utilitatē expetitur. diducitur in partes octo. In bonorum adeptionem, incrementum, conseruationem, usum: malorum euitationem, liberationem, imminutionem, conuersionem. Qui loci secundū Demosthenem duplicantur: si feceris cum octo locis, si non feceris cū alijs octo. Cū utile dico, necessarium etiā intelli-

Quintil. li.
 5. cap. 10

intelligo cum Hermogene.

Cap. de
Prag. stat.

Honestū est, quod sua ui & dignitate ad sese alli-
ciat. Honestum siue uirtus quatuor habet partes:
prudentiā, iustitiam, fortitudinem, temperantiam.
Prudentia est rerū bonarū & malarū scientia,
cuius partes sunt, memoria, intelligentia, prouidē-
tia. Iustitia est habitus animi communi utilitate
conseruata, suā cuiq; tribuēs dignitatē. Omne au-
tē ius aut est naturæ, aut consuetudinis, aut legū.
Natura ius est, quod nobis non opinio, sed quædā
innata uis afferat, ut religionē, pietatem, gratiā,
obseruantiam, ueritatem. Cic. Est enim hæc iudi-
ces nō scripta, sed nata lex, quā non didicimus, ac-
cepimus, legimus: uerū ex natura ipsa arripuimus,
hausimus, expressimus: ad quā non docti, sed facti:
nō instituti, sed imbuti sumus: ut si uita nostra in
aliquas insidias, si in uim, in tela aut latronū, aut
inimicorū incidisset: omnis honesta ratio esset ex-
pediēde salutis. Hæc lex naturalis dicitur alio no-
mine equū & bonū, aut certē non multū discre-
pat ab ea. Consuetudine ius est quod uoluntate
omnium sine lege uetustas cōprobarit. ut pactum,
par, iudicatū. Pactum est, quod inter aliquos cōue-
nit, quod iā ita iustum putatur, ut iuri præstare di-
catur. Par, quod inter omnes æquabile est. Iudica-
tum,

Pro Milo.

D E A R T E

tum, de quo iam antè sentētia alicuius, aut aliquorum constitutum est. Lege ius est, quod in eo scripto, quod populo expositum est ut obseruet, continetur. Fortitudo est considerata periculorum susceptio, & laborum perpeſſio. Eius partes magnificentia, fidētia, patientia, perseuerantia. Temperantia, est rationis in libidine, atq; in alios non rectos impetus animi firma & moderata dominatio. Eius partes sunt, cōtinētia, clemētia, modestia. Sūt præterea quædam quæ nec prorsus utilia, nec omnino dicuntur honesta: sed quia nos cum dignitate, tum quoque fructu suo ducant ad se, honesta quoq; dicuntur, quo in genere est gloria, dignitas, amplitudo, amicitia. Hæc ex secundo de inuentione Ciceronis duobus in locis, unde qui plura huc spectantia uoluerit, petito.

D E F I N I T I O N I S S T A T V.

Diffinitiuæ constitutio est, qua id quod obijci-
tur, non esse hoc contendimus, aut cū in scri-
pto uel aliqua lege uerbum aliquod est positum
cuius de uī quæritur. ut quæsitū est in causa Man-
Cic. 1. Orat. cini, sit ne senator qui hostibus deditus est, nec re-
ceptus. Huius status hos locos tradit Hermogenes:
Expo=

Expositionem, finitionem, cōtrariam finitionem, ratiocinationē, intentionem legislatoris, amplificationem, comparisonem, assumptionem aliquando, repulsionem, absolutionem, Qualitatem communem, intentionem personæ.

Expositio in hac parte idem ferè est quod in coniectura cōprehensio. Ducamus exemplū hoc per omnes locos. Tyranno persuasit orator, ut tyrannidē deponeret: præmium petit: contradicitur. Expositio est. Amore patriæ cōmotus, tyranni domū adiit, de tyrannidē deponenda, non sine capitis periculo uerba feci. Deposuit tyrannidem me impulsore, quod nō fecisset, nisi ego illi persuasissem: præmium igitur interfecti tyranni iure peto.

Diffinitio propulsatoris est, contraq; expositionem adfertur. ut, non hoc est interficere tyrannum, quandoquidem tyrannus uiuit. Huc ferè semper accedit etymologia, quæ quodammodo est diffinitio, ut, interficere est confodere & uita priuare, tyrannus uiuit, non igitur est interfectus.

Contraria finitio. Tyrannidem amouere qui potuit, perinde fecit ac si tyrannū interfecerit: Idē enim est tyrannidē amouere, et tyrannū interficere.

Ratiocinatio siue syllogismus, cū ex positis non posita elicimus: utriusq; partis est. Vt. Quæ
C cunq;

tunq; solēt cucnire in libera ciuitate, ea omnia bona nunc euenēre mea cause, tyrānis cessat: respublica est liberata: in arce nullus est quē timeamus. Letitia in urbe: iuste igitur prēmium interfec̃ti tyranni peto. Magna (inquit alter) est differentia, multa enim aliter sese haberent, ac nunc habent: qui enim tyrannum consilio interfecit, laudibus ornatur, triumphis decoratur, fortis & clarus habetur.

Sententia siue intentio legislatoris ab utraque parte exquiritur. Vt, Nihil aliud uoluit qui prēmia tyrannicidis constituit, quā ut leges liberæ permanerent, respublica sedata, libertas in ciuibus. Alter contrā: non ignorasse legislatorem multis modis posse tyrannum expelli, noluisse tamen prēmia proponere nisi solis tyrānicidis: uoluisseq; tyrannum non impunitum abire.

Amplificatione rem magnam esse ostendet qui accusat: paruam qui defendet. à loco, tempore, persona, magnitudine, modo.

Comparatio est cū multò maius aut minus ostendimus quod factum est, quā quod aduersarij dicūt. Vt, Maius etiam atq; diuinius est sine cæde, sine sanguine, sine tumultu, & armis: quāurbatione, seditione, tumultu, & prælio remp. libera

re. Alter contrà. Minus est abigere, quàm interficere. Hunc enim uiuum semper timeamus necesse est, ne suis rebus confirmatis nos opprimat, qui fortè nunc armis destitutus aut pecunijs persuasioni faciles aures præbuit.

Assumptio, quam Græci antithesin uocant, unus est ex qualitatibus statibus, ut dicemus, sed hic locus est qui per relationem, aut remotionem, aut cōparationem, aut concessionem rem expurgat. In petitione non inuenitur: in alijs causis saepe: ut, quidam inuentum cum uxore eunuchum aequè ac moechum interfecit. Accusatur, quod eunuchus non possit esse adulter. Assumptio relatiua est, quod dignus erat interfici. Explicabitur hic locus in qualitate.

Repulsio. At isto pacto tyrannum nō debebas expellere, si bene de republica mereri cogitabas.

Absolutio. Hoc modo mihi uisum est & posse, & decere melius fieri quàm alio quouis.

Qualitas communis à persona sumitur, & per attributa personarum tractatur, ut in coniectura.

Intentio est cum qua uoluntate id egerit, consideramus: excute attributa personarum.

D E S T A T V Q V A

litatis.

C 2

Cum

Metam. 13

Cum et facto et facti nomine concessio uis et natura et genus negotij ipsius quaeritur: constitutione generale appellamus siue qualitatis. Qualitas ergo aut uersatur in scripto, diciturque status legalis: aut in re, et est rationalis: cuius duae sunt partes: nam aut est de re praeterita, aut futura. Si de re futura pragmaticus siue negotialis appellatur. Vt contentio inter Aiacem et Vlysssem de armis Achillis. Habet haec capita. Legitimum, æquum et bonum, utile, possibile, laudabile, euenturo. de quibus in coniectura, cum egimus de potestate et qualitate, diximus. Si autem sit de re praeterita dicitur iuridicialis: cuius duae sunt partes, absoluta et assumptiua.

Absolutus status est qui intra se continet iuris et iniuriae quaestionem: aut quando reus nullam se uictam rem fecisse confirmat. Vt, quidam filium abdicauit quod philosophiae operam daret. uel, Si Actius poeta iniuriarum ageret, quod eum mimus quidam nominatim in actione appellauit. Huius status est causa Ciceronis pro Cornel. Balbo. Haec constitutio his locis absoluitur: Expositione, partibus iuris de quibus in coniectura, persona, diffinitione, ratiocinatione, intentione legislatoris, amplificatione, comparatione, absolutione, repulsione, assumptiua.

assumptione, qualitate cōmuni, intentione personæ.

Assumptiuus status est in quo reus quidem re turpem se fecisse non negat, re tamen assumpta extranea iure factum defendit. Id facit quatuor modis, relatione criminis, remotione criminis, cōparatione criminis, concessione criminis.

Relatio criminis est cū in eum, qui passus est, culpam reijcimus, ut Orestes in matrem. Huius status hi loci numerantur: Expositio, diffinitio, ratiocinatio, intentio legislatoris, ampliatio, cōprehensio, intentio personæ, assumptio, repulsio, comparatio, qualitas communis.

Remotio criminis quando crimen transfertur nō in eum qui passus est, sed in alium, uel in aliud. Vt in hac lege: Legatus intra decimum diem proficiscatur. Quidam cū in legationem mitteretur, non profectus est intra præscriptum diem. Accusatur. Ipse reijcit in quæstorem culpam, qui pecunias non dederit. In aliud causa dimouebitur ut in hoc eodem exemplo: si quæstor mortuus esset, & idcirco pecunia legato non esset tributa. Huius status iidem loci enumerantur, qui & præcedentis.

Comparatio criminis est quando reus se fecisse fatetur, contendit tamen (cū alterutrum esset necesse facere) rectius fecisse. Vt, Aulus Albinus à

D E A R T E

Iugurtha obsessus, cum effugere non posset, pactus cum Iugurtha est, ut impedimenta relinqueret, exercitumq; sub iugū mitteret. Accusatur quod læserit maiestatem. Loci sunt qui & superioris status.

Concessio criminis est, cum reus causam in id transfert, quod in iudicium accersiri nullo modo potest: ut fatum, fortuna, necessitas, imprudentia. Talis est causa Ciceronis pro Rabirio Posthumo. Hic status diuiditur in purgationē & deprecatio nem. Purgatio tractatur iisdem locis quibus relatio. Deprecatio autem quia sola in iudicium non uenit, aliter debet tractari. Locus erit deprecatio ni apud summum imperatorem, uel senatum, uel deniq; apud eum qui meram obtinet absoluēdi potestatem. Talis est causa Ciceronis pro Ligario ad Cæsarem. Nec pro quibuslibet concessum est deprecari, sed pro uiro forti, aut pro eo cuius extent in reip. merita, aut in eos ipsos qui audiunt. Quod si nulla eius extent merita, maiorū uel affinium scrutabimur. Deprecationis hæc possunt esse capita: Extenuatio, quæ cleuabimus quæ facta sunt, ne tā horrida uideantur, quā aduersarij uolunt probare: uoluntas, de qua in coniectura: comparatio, cum mala quæ fecimus cum meritis in reip. cōferimus: attributio, quæ ex attributis personæ

sonarū elicitur, in quibus tuam & auditoris personā perscrutaberis: quod facit Cicero pro Ligario dum Cæsaris misericordiam laudat: euentus, si nihil periculi ex hoc facto futurum demonstrabimus, sed boni plurimum: commiscratio, in qua per attributa rerum poteris auditorem commouere. Qui omnes loci ab aduersario possunt inuerti. Assumptiui autem status mutuò sese adiuvant, & in causa Milonis omnes inueniuntur. ut Milo Clodium interfecit. Relatio, Iure interfectus est ab eo cui necem parabat. Remotio, Iure occisus quia patrie uexator. Comparatio. Vtilior rei pub. eius mors quàm uita fuit. Concessio et deprecatio in epilogo inueniuntur orationis. Nunc ad status legitimos accedamus, quos Ciceronem & Hermogenem sequuti sub qualitate numeramus. Lib. 2. de Oratore.

Legitima constitutio est quæ descripto uno uel pluribus nascitur. Huius quatuor sunt partes, Ambiguum: Scriptum & sententia: Contrarie leges: Ratiocinatio.

Ambiguū est cū scriptū plures sentētiās significat. ut in testamēto quidā scripsit: Hæres meus det uxori meæ argēti pōdo cētū quod elegerit. Quis debeat eligere, in dubium uertitur. In hoc genere utriq; parti dātur præcepta cōia. Vterq; enim hāc Ex Cicer.

significationem, qua utetur ipse, dignam scriptoris prudentia esse defendet. Vterq; id quod aduersarius ex ambigüe scripto intelligendū esse dicet aut absurdum, aut inutile, aut iniquum, aut turpe esse defendet, aut etiam discrepare cū cæteris scriptis uel aliorum, uel maximè, si poterit, eiusdem: quamq; defendit ipse, eam rē & sententiā quemuis prudentē & iustum hominem, si integrū dare tur, scripturum fuisse, sed planius: eamq; sententiā quam significari posse dicet, nihil habere aut captionis, aut uitij: contrariā autem si probarit, fore ut multa uitia, stulta, iniqua, cōtraria cōsequatur.

Scriptum & sententia est, quando alius uerba scripti, alius scriptoris mentē amplectitur. ut Lex peregrinum uetat murum ascendere. Ascēdit: hostes repulit. Accusatur. Qui scripto nitetur, cum re exposita, recitatione uti oportebit: deinde instare aduersario, iterare, renouare, interrogare nū aut scriptum neget, aut contra factum inficitur. Post iudicem ad uim scripti uocet. Hac confirmatione usus, amplificet rem lege laudanda, audaciamq; confutet eius qui cū palam contrā fecerit, idq; fateatur, adsit tamen, factūq; defendat. Deinde infirmet defensionē, cū aduersarius aliud uoluisse, aliud sensisse scriptorem, aliud scripsisse dicat,

dicat, non esse ferendum à quoquam potius lato-
 ris sensum,quàm à lege explicari. Cur ita scrip-
 serit, si ita non senserit. Cur cùm ea quæ planè
 scripta sint,neglexerit:quæ nunquam scripta sint
 proferat. Cur prudentissimos in scribendo uiros
 summæ stultitiæ putet esse damnandos. Quid im-
 pedierit scriptorem quo minus exciperet illud
 quod aduersarius,tanquam si exceptum esset, ita
 dicit se secutum. Vtetur exemplis ijs quibus idem
 scriptor:aut,si id non poterit,quibus alij quod ex-
 cipiendum putarint,exceperint. Quærenda etiam
 ratio est,si qua poterit inueniri,quare nō sit ex-
 ceptum:aut iniqua lex,aut inutilis futura dicetur,
 aut alia causa obtemperandi,alia abrogandi:dis-
 sentire aduersarij uocem, atq; legis. Deinde am-
 plicandi causa,de conseruandis legibus,de peri-
 culo rerum publicarum atq; priuatarū,cum alijs
 locis,tū in perorando maximè grauitè erit uehe-
 menterq; dicendum. Ille autem qui se sententia le-
 gis uoluntateq; defendet,in consilio atq; in mente
 scriptoris,non in uerbis ac literis uim legis posi-
 tā esse defendet:quodq; nihil exceperit in lege,lau-
 dabit, ne diuerticula peccatis darentur,atq; ut ex
 facto cuiusq; iudex legis mētem interpretaretur.
 Deinde erit utendum exemplis, in quibus omnis
 C 5 æqui-



1
æquitas perturbetur, si uerbis legū, ac non sententijs pareatur. Deinde genus eiusmodi calūditatis & calumniæ retrahatur in odiū iudicis, cū quādam inuidiosa querela. Et si incidet imprudentiæ causa, quæ non ad delictū, sed ad casum necessitatē pertineat, erit æquitatis sententijs cōtra acerbiter uerborum deprecandum. Cicero pro Cinnā multa pro sententia contra literā disputat.

Contrariæ leges sunt, quando in uno uel in pluribus scriptis ex aliqua circumstantia contradictio inuenitur. In uno sic: Rapta raptoris aut mortē, aut indotatas nuptias petat. Quidam duas uirgines rapuit: quarum una coniugium, altera mortē optat. In pluribus hoc modo: Lex, filius meretricis orator ne sit: Lex, uir fortis optet quæ uolet: quidam meretricis filius euasit uir fortis, optat ut liceat sibi esse oratori. Contrariæ leges, uno excepto loco, idem sunt quod duplex scriptum & sententia. Nā semper est efficiendū, ut alterius scripti sententiam, alterius uerba defendamus. Ita quæ modo de scripto sententiāq; præcepta sunt, eadem huc omnia transferamus. Locum uero quem huic cōstitutioni diximus peculiārē, Græci periechon, Latini continentia dicunt: & est locus quo diuersis quibusdam positis scriptis diligenter quid contineant,

timeant, quidq; contineatur, consideramus: hoc est, si possumus huiusmodi earum legum naturā ostendere, ut si una observatur, altera etiam simul observetur: & si de illa derogatur, de hac etiam derogetur. ut in proposito exemplo de illo qui duas uirgines rapuit: melius utriq; parti satisfieri dicemus, si occidatur, quā si illarū alterā ducat uxore. Considerabimus etiam utrū una lex iubeat, altera permittat. Lex etiam inferior cedit superiori, ut humana diuinæ, generalis speciali, uetus nouæ.

Ratiocinatio est, cū res, quæ sine propria lege uenit in iudiciū, cuiuspiam legi accommodatur. Lex, Tyrannicide præmiū detur. Nō occidit, sed expulit, aut persuasit ut abiret: par esse contendit quia reddidit libertatē. Qui patrē occiderit, culco insuatur: matrē occidit. Lanas uehere Tarento non licet: oues uexit. Loci huius cōstitutionis uarij & multiplices sunt, quia cōiecturæ, finitionis, et qualitatis esse potest quæstio. Sed aliquot apponamus. Scripti laus, & confirmatio. Collatio rei de qua quæritur cū ea de qua constat ut similes uideātur. Quē fieri possit, dicet, ut qui hoc æquum esse cōcedat, illud neget, quod aut æquius, aut in eodē sit genere. Deinde iccirco de hac re nihil esse scriptū, q̄ ex illa satis liqueret. Postea multis in legibus multa esse

D E A R T E

esse præterita, quæ idcirco præterita nemo arbitretur, quòd ex scriptis intelligi possint. Deinde æquitas rei demonstranda est. Contrà uerò qui dicit, similitudinem infirmabit, ostendens illud diuersum esse genere, natura, ui, magnitudine, tempore, loco, persona, opinione. Periclitari dicet omnia iura, si similitudines accipiatur, nihil esse penè quod nò alteri simile esse uideatur. Hæc de inuentione. Quòd si quis præterea requirat, quomodo possit inuenire affectus in quibus permouendis regnat orator, primū cū Cicerone respondebo totū hunc locum philosophorū esse proprium: deinde, nullā aliam artē esse inueniendorū affectuū, quā quæ tradita est circa personarum & rerum attributa. Nunc ad secundam partem transcamus.

De Orat. 1
& 2

D E D I S P O S I T I O N E.

Dispositio, est apta rerū inuētarū collocatio. Cuius duo sunt genera, argumentatio & methodus. Nam aut unū disponimus argumentū, aut plura. Argumētatio est unius argumenti cū quæstione cōstans & firma collocatio. Vnde quæstio ipsa uera uel falsa iudicatur. Hæc est illa pars quæ propriè iudicium nominatur: iudicamus enim
de

de rebus omnibus argumentatione siue syllogismo. Argumentationum genera omnia facile ad unum dialecticorum syllogismum referuntur. Sed quia rhetores miseris dialecticæ legibus non adstringuntur, aliter de syllogismo præcipiūt quàm dialectici. Argumentationis igitur quinque sunt genera. Syllogismus, enthymema, dilemma, inductio, sorites, quibus addunt exemplū, sed impropriè. nā exemplum argumentum est à pari, aut maiori, aut minori, non argumentatio. Epicherema aut generale nomen est ad omnem argumentationem, aut quoduis argumentum significat, quo aggredimur aduersarium.

1. Syllogismus, siue collectio, siue ratiocinatio est argumentatio ex ipsa re probabile aliquid eliciens. Habet quinque partes, propositionē, rationē, rationis confirmationem, expolitionem, conclusionē. Vt si uelis probare Ciceronis filium patris uirtutē sectari oportere. Propositio sumitur ex attributis, ut à genere, sic. In maiore natos familia maiori uirtute debere respondere consentaneum est. Ratio sumitur à circumstātijs, ut à persona. Quid enim magis idoneum quàm Cicerone parente natū, eloquentia Ciceronem exprimere? à re: Quid magis consentaneū quàm filium in ea scientia laborare,

D E A R T E

borare, quæ patri peperit immortalæ decus: à loco: Romæ præsertim, ubi summus eloquætiæ habetur honos. à tempore: Ea præsertim tēpestatē, cum maximè opus est eloquentia, ad depellenda mala quæ in rempublicam grassantur. Confirmatio petitur à simili, exemplo, contrario, maiori, minori, pari. ut, Scipio gloriam rei militaris cōsectabitur, in qua sui maiores floruere: Cato proavi sui gratitudinem amplectetur: & Ciceronis filius eloquentiā & vim dicendi aspernabitur? Expolitio, est exemplorum cōparatio cum causa quā tuemur. ut. Atqui Scipioni & Catoni singularis erat honestas, etiā si nulla uirtute floruisent, quòd in tantā familia nati essent: Ciceronis filius si parenti non respondeat, humi iacebit, quòd non uetustate generis illustretur. Hic poteris gloriā rei militaris cū eloquentia cōparare, et Scipionis laudi Ciceronis laudem antepone. Conclusio crit, in qua aut inferemus breuiter quæ uolumus: ut, consectanda igitur eloquentia filio Ciceronis. aut in breuitatē omnes partes redigemus à capite rursus ducto principio. ut. Quare si hoc illustriū imaginū propriū est ut uirtutē exprimant maiorū: si patri tuo singularem attulit laudem eloquentia: si magis honorificum crit tibi ad patris laudem animū adijcere,

quā

quàm Scipioni, aut Catoni: reliquum est iam ut
omni studio tibi ad eloquentiam sit incumbendū.

2 Enthymema unū intellectum habet, quo omnia
mente concepta significantur, alterū quo sentētia

cum ratione. Hora. Nil mortalibus arduū est, Cœ
lū ipsum petimus stultitia. Propriè tamen dicitur

sententia quæ sit ex contrarijs. Hora. Vt iugulent
homines surgūt de nocte latrones: ut teipsum ser-

ues nō expergisceris? Cic. Quē igitur cū omnium
gratia noluit, hunc uoluit cum aliquorū querela?

Quem iure, quem loco, quem tēpore, quem impu-

nè non est ausus: hunc iniuria, iniquo loco, alieno
tempore, cū periculo capitis non dubitauit occide-

re? Potest etiam tres habere partes, propositionē,
conclusionē, & eius rationē. Cic. Quòd si XII.

tabule nocturnū furem quoquo modo, diurnū au-

tē, si se telo defenderit, interfici impunè uoluerūt:

quis est, qui quoquo modo quis interfectus sit, pu-

niendū putet: cum uideat aliquando gladiū nobis
ad occidēdum hominem ab ipsis porrigi legibus.

Interdū una tantū assumptione, quā minore uocāt
dialectici, contenti sumus. ut si dubites, an hæc mu-

lier diligit illū pucrū: respondeo: est mater. quasi
dicā. Omnes matres diligunt filios, hæc est mater,
hæc ergo diligit filiū. Et si dubites de fortitudine

Miseni.

Carm. 1

Epist. 1

Pro Milo.

Pro Milo.

- AEne. 6** Miseni, respondebit Virgilius: Hec toris hic magnu
AEne. 3 fuerat comes. Idem de Polyphemo. Trunca manus
pinus regit, & uestigia firmat.
- Philip. 2** 3. Dilemma siue complexio est argumētatio in
qua utrū concesseris reprehenditur. Cic. Miserū
siue illa tibi nota non sunt, nihil enim boni nosti,
Heaut. siue sunt. Terēt. Vel me monere hoc, uel percon=
tari puta: Rectū est, ego ut faciam: non, ut deter=
reā. sic enim dispungendus est locus, nusquā hacten=
us ab interpretibus explicatus. quasi dicat: aut
hoc quod facis, rectū est, aut non. si rectū, ego idē
faciā, si non est rectū, ut te auellam et separem ab
Philip. 5 huiusmodi opere. Cic. Hoc qui non uidet, excors:
qui cū uidet, decernit, impius. Dilemmati aliquā
do opponitur aliud dilemma quod Græci biaō siue
antistrephon appellant, Latini uiolationem. ut il=
lib. 5. ca. 10 lud apud Gellium de Prothagora & Euathlo. Di=
cebat enim Prothagoras: Si pronunciatū erit cō
tra te, debebis ex sententia: si secundū te, ex pacto.
Cui discipulus: Si iudices senserint pro me, nihil
ex sententia: si contrā, nihil ex pacto debebo. Et
Socrates non sinebat filium orare, dicens: Si iusta
loqueris, hominibus eris inuifus: sin iniusta, Deis.
Imò orationes oportet habere: Nam si iusta lo=
quor, Dijs gratus ero: si iniusta, hominibus. Et si
quis

quis uelit suadere non esse timendam cœli asperitatem, ita disputet: si fuerit hyems, nō æstuabimus: si æstas, non algebimus. Imò maximè timenda cœli asperitas: nam si fuerit hyems, algebimus: si æstas, æstuabimus. Hinc illud Biantis cuidam adolescenti suadentis ne uxorem duceret: Nam si formosa est, habebis cōmunem: si deformis, pœnam. Cui adolescens: Imò si formosam duxero, non habebo pœnam: si deformem, nōn erit cōmunis.

4 Inductio fit, cum plura exempla plurę sue similitudines ad unum effectum congeruntur. Græcè dicitur Epagoge: qua plurimùm Socrates utebatur. Polyphemus apud Ouidium.

Meta. 13

Nec mea quòd duris horrent densissima setis.
Corpora, turpe puta: turpis sine frondibus arbor:
Turpis equus, nisi colla iubæ flauentia uelent:
Pluma tegit uolucres: ouibus sua lana decori est:
Barba uiros, hirtęq; decent in corpore setę.

Et AEneas apud summum poëtam.

AEne. 6

Si potuit manes arcessere coniugis Orpheus
Threicia fretus cithara, fidibusq; canoris:
Si fratrem Pollux alterna morte redemit,
Itq; reditq; uiam toties: quid Thesea? magnum
Quid memorem Alciden? & mi genus ab Ioue
summo.

D

S Son

Fin. 4

Tusc. 3

Epist. 2

§ Sorites est syllogismus accerualis, captiosum argumentandi genus, in quo ex uno cōcesso, ad multas conclusiones connexas descenditur. Cice. Iam ille sorites, quo nihil putatis esse uitiosius: quod bonum sit, id esse optabile: quod optabile, id esse expetendum: quod expetendum, laudabile: laudabile autem omne honestum: igitur omne bonum honestū. Idem. Præterea necesse est, qui fortis sit, eundem esse magni animi: qui magni animi, inuictum: qui inuictus, cum humanas res despicere, atque infra se positas arbitrari: despicere autem nemo potest eas res, propter quas ægritudine affici potest: ex quo efficitur, fortem uirum ægritudine nunquam affici: omnes autē sapientes fortes: nō cadit igitur in sapientem ægritudo. Themistocles itē Atheniensem dux filiū Diophantum, quem in delicijs habebat, sic plurimū posse colligebat: Athenienses dominantur Græcis: ego Atheniensibus: mihi uxor: uxori filius: ergo filius Græcorum omnium est potentissimus. Horatius etiam captiosè argumētatur nihil interesse inter poëtas ueteres et nouos: Vtar (inquit) permissio, caudæq; pilos ut equinæ Paulatim uello, & demo unum, demo etiam unū: Dum cadat elusius ratione ruentis accerui. Chrysippus multus fuit in hoc genere, unde quemadmodū Socraticas

craticas inductiones: sic Chrysippeas soritas appellamus. Pers. Inuētus Chrysippe tui finitor acerui. Saty. 6

DE METHODO, SIVE
oratione.

Methodus est multorum atque uariorum argumentorum dispositio: ea duplex est, altera doctrinae, prudentiae altera. Methodus doctrinae est dispositio rerum uariarum ab uniuerſis & generalibus principiis ad subiectas & singulares partes deductarum. Qualis ordo est huius nostri libelli: posuimus enim diffinitionem artis, deinde partes, & quid quæq; partes contineant. Quo in genere non omittendæ sunt transitiones, maximæ enim perspicuitatē narrationibus solent afferre. Sic Virgilius cū partitus eſſet opus Georgicōn in quatuor partes, prima exposita, subdit.

Hactenus aruorum cultus, & sidera cœli:
Nunc te Bacche canam. Methodus prudentiae pro conditione personarum, rerum, temporū, locorum consilium disponendi suppeditat. Hinc fit ut oratores sæpè ex industria, quia docendæ sunt personæ, quæ doceri tamen nolunt, rerum partitiones detrahant: narrationes differant:

refutationes præponant. Hinc illa obliqua principia, quas insinuationes uocamus. Nam Cicero in secunda Agraria. cum ad euerendam populi causam accessisset, longa utitur, insinuatione, qua se maximè fingit popularem. & Tercentiana Thais cum uellet ab irato Phædria biduum ut militi cōcederet, impetrare nulla huius rei mentione facta, longo sermone circumduxit adolescentis animum, donec omnia tuta existimauit, maxima etiā ex parte Phædria sibi conciliato: tum demum extremum posuit, quod natura & ordine doctrinæ erat primum. Hæc quæ de utraque methodo diximus, ne noua alicui appareant, Ciceronis uerbis repetamus. Is igitur secundo Oratorio sic loquentem inducit Antōnium. Itaq; nunc illuc redeo Catule, in quo tu me paulò antè laudabas, ad ordinem collocationemq; rerum ac locorum: cuius ratio est duplex: altera quam affert natura causarum: altera, quæ oratorum iudicio & prudentia comparatur. Nam ut aliquid ante rem dicamus, deinde ut rem exponamus, post ut eam probemus nostris præsidij confirmandis, contrarijs refutandis, deinde ut concludamus, atque ita peroremus: hoc dicendi genus natura ipsa præscribit. Ut uerò statuamus ea quæ probandi, docendi, persuadendi

dendi causa dicenda sunt, quemadmodum componamus, id est uel maximè proprium oratoris prudentiæ. Multa enim occurrunt argumenta, multa quæ in dicendo profutura uideantur: sed eorū partim ita leuia sunt, ut contemnenda sint: partim etiam si quid habent adiuuenti, sunt nonnūquam eiusmodi, ut insit in ijs aliquid uitij, nec tantū sit illud quod prodesse uideatur, ut cum aliquo malo coniungatur. Quæ autem sunt utilia atque firma, si ea tamen (ut sæpè fit) ualde multa sunt: ea quæ ex his aut leuissima sunt, aut alijs grauioribus consimilia, secerni arbitror oportere, atq; ex oratione remoueri. Equidem cum colligo argumenta causarum, non tam ea numerare soleo, quàm expendere. Et quoniam, quod sæpè iam dixi, tribus rebus omnes ad nostram sententiam perducimus, aut docendo, aut conciliando, aut permouendo: enitendū est, ut nihil aliud nisi docere uelle uideamur: reliquæ duæ partes, sicut sanguis in corporibus, in perpetuis orationibus fusæ esse debent. Et paulò inferius. Hisce omnibus rebus consideratis, tum deniq; id quod primum est dicendū, postremò soleo cogitare, quo utar exordio. Nam si quando id primum inuenire uolui, nullum mihi occurrit, nisi aut exile, aut nugatorium, aut uulga

DE ARTE

re, atque commune. Hisce Ciceronis uerbis iam admonemur ut aliquid de partibus orationis dispu-temus. Sunt autem quatuor: exordium, narratio, confirmatio siue confutatio, epilogus.

DE EXORDIO.

EXordium est oratio, quæ animum auditoris preparat ad audiendum: solet fieri aut palam, aut latenter. Nam cum causa honesta siue probabilis est, recto exordio siue principio utimur: sin autem turpis, aut auditor est persuasus, aut defessus, circuitione utimur, quam insinuationem uocamus. Tria præstanda sunt in exordio siue insinuatione, ut beneuolum, aut docilem, aut attentum reddamus auditorem.

Amicos & beneuolos facimus auditores à persona, & a re ipsa. A persona nostra, si nostrum officium sine arrogantia laudabimus: & quales in reipub. aut eos ipsos qui audiunt fuerimus, ostendemus: item si nostra incommoda, solitudinem, inopiam, calamitatem proferemus. A persona aduersariorum tribus modis, nã si potentes sunt, in inuidiam: si abiecti & humiles, in contemptum: si turpes & nocetes, in odium rapimus. A persona auditorum, si res
eorum

eorum sine assentationis suspitione laudabimus. A re ipsa, si causam nostrā extollemus, & aduersariorū deprimemus. Indigemus beneuolētia cū turpis causa est, aut cū aliqua turpitudine cōiuncta.

Docilem reddemus auditorē summam rei breuiter & dilucidè indicando. Docilitas igitur in causis obscuris locum habet.

Attentionem captabimus, si magna quædam proponemus, necessaria, noua, inaudita, ad religionem, aut ad eos ipsos qui audiunt, pertinentia. Et si rogabimus ut attentè audiamur. Cū causa humilis est & abiecta maximè attentione captanda grandescit. Quod egregiè præstitit Virgilius de apibus dicturus. Hæc de exordio in genere iudiciali. Geor. 4.

In genere demonstratiuo liberrima sunt proœmia. Nam aut ab historia, fabula, prouerbio, sententia, simili: aut ab officio, loco, tempore, persona, à re denique ipsa exordiri licebit, ut fecit Cicero pro Marcello.

In genere suasorio sunt qui uelint nulla esse exordia, quia illi qui sunt audituri, sua sponte parati accedant. Sed quia est semper aliquid in omni re naturaliter primum, à persona, loco, tempore, & adiunctis commodè exordiemur.

D E A R T E
D E N A R R A T I O N E .

N Arratio iudicialis est rei factæ uel tanquam factæ utilis ad persuadendum expositio . Ea debet esse brevis, dilucida, uerisimilis.

Breuitatem hîc appello uirtutem quandam in dicendo, quæ ornatu & elegãtia nõ careat, in qua nec redundat quicquam, nec deficit. Quam uirtutẽ multi dum sequi conantur, specie recti decepti, fiunt obscuri, breuitatis præcepta ignorantes . Brevis erit igitur narratio, si nõ à primo principio repetetur: & si summam, non particulatim narrabimus: si quæ nõ iuuant, prætermittemus: si ita unius cuiusq; rei dicemus exitum, ut quæ præcesserunt, intelligantur: si usque eo, quo opus fuerit, progrediemur: si nullis circuituionibus utemur, & si semel dicta non repetemus.

Dilucida erit, si rerum ac temporum ordinẽ seruabimus: si proprijs ac usitatis uerbis utemur: si breuitatis præcepta nõ aspernabimur: ac demũ si tota narratio rebus, personis, temporibus, locis, ac causis ita fuerit distincta, ut nihil confundat: hoc enim non solum ad dilucidam, sed ad uerisimilem quoque pertinet narrationem.

Verisimilis siue probabilis erit, si ut natura
rei,

rei, & mores hominum, ac opinio postulat, narrabimus: si causæ consiliorum, rerumq; rationes constabunt: ut nihil factum, nihil dictum sine causa putetur. Si falsum narrabimus, danda est opera, ut omnia cohereant, iuxta prouerbum: Mendacem memorē esse oportet: sin uerum, nihilo secius diligentē operam adhibebimus, ut credamur: nam (ut inquit Fabius) sunt plurima uera quidem, Lib. 4 sed parum credibilia: sicut falsa quoque frequenter uerisimilia.

In genere laudis tota ferè oratio nil aliud est quàm narratio. In hoc genere, nisi historiam scribas, poteris temporis ordinem non seruare.

In suasio narrationes aut nullæ aut breues erunt. Nam cū ad docendum sit inuenta narratio, hīc inutilis uideri poterit, quum auditores sint edocti:

DE CONFIRMATIONE ET confutatione.

TOta spes uincendi ratioq; persuadendi posita est in confirmatione & confutatione. Ut igitur nostra confirmemus & aliena dissoluamus, huc referenda est tota illa materia de stati-

D E A R T E

Orat. 2

bus. Quo uerò ordine inuenta argumenta sint col-
locanda, docet his uerbis Cicero. Res, inquit, hoc
postulat, ut eorū expectationi qui audiunt, quā
celerrimè succurratur: cui si initio satisfactū non
sit, multò plus sit in reliqua causa laborandum.
Malè enim se res habet, quæ non statim, ut dici
coepta est, melior fieri uidetur. Ergo in oratione
firmissimum quodq; sit primum: dum illud tamen
in utroque teneatur, ut ea quæ æquè excellent,
seruentur etiam ad perorandum: si quæ erunt me-
diocria (nam uitiosis nunquam esse oportet locū)
in mediam turbam atque in gregem cōiiciantur.

Laus ferè nullam habet confirmationem, quia
certa non dubia in laude prædicantur: si tamen
inerit aliqua, ex locis personarum & rerum erit
petenda.

In suasionem confirmatio tota causa est, cū pos-
sit exordio & narratione carere.

D E E P I L O G O.

Peroratio, quam quidam cumulum, alij conclu-
sionem, Græci epilogum uocant, diuisa est in
duas partes, enumerationem & amplificationem.

Enumeratio, quæ Græcè anacephaleosis di-
citur,

citur, non omnia minima repetet, ne ostentatio memoriae uideatur, sed pondera ipsa rerum comprehendet.

Amplificatio est grauior quædam affirmatio, quæ motu animorum conciliet in dicendo fidem. Hæc genere uerborum conficitur & rerum: uerba ponenda sunt, quæ uim habeant illustrandi, nec ab usu sint abhorrentia, grauiâ, plena, sonantia, & quæ in elocutione dicentur. Rerum amplificatio sumitur ex locis, ut causis, effectis, similibus, exemplis, contrarijs: fictæ etiam personæ, muta denique loquantur: omniâque sunt adhibenda, quæ natura uel usu apud homines habentur magna. Sed quod in hac parte primas obtinet, permotio affectuum est, quæ pars ab oratore bene tractata eloquentiam efficit admirabilem. Sed, ut multi affirmant, à philosophia pendet omnis. Socrates uerò negat posse arte tradi, sed diuino In Ione: furore contingere. Nihilominus tamen pauca de affectibus dicamus. Affectus siue animi permotiones multi sunt: sed ad quatuor tantum capita posse reduci, hac methodo colligamus. Boni uel mali opinione commouentur homines: si boni præsentis, uoluptas est: si mali, aegritudo: si boni futuri, cupiditas: si mali, metus. Rursus omnes

omnes affectus aut sunt lenes aut concitati, illud genus Græci ethicon appellant, ad naturam, & ad mores, & ad omnem uitæ consuetudinem accommodatum: hoc patheticon nominant, quo per turbantur animi, & concitantur, uehemens, incensum, incitatum: quo causæ eripiuntur, quod cū rapidè fertur, sustineri nullo pacto potest. Affectus, etiam si philosophorum sint, nō aliunde quàm ex topicis trahuntur, ut à loco, tempore, persona, simili, contrario, sexu, etate. &c. Sed regulam auream, quæ sit multarum instar, ad omnes affectus mouendos adhibeamus, quam deceptus memoria

lib. 6. ca. 2

Quintilianus non aliquo tradente, sed experimēto suo ac natura ipsa duce inuenisse se gloriatur: cū à Cicerone multis uerbis, & ab Horatio in arte poëtica per multa carmina, & denique à

Saty. 1

Persio sit repetitum præceptum hoc, ut si quem mouere uelimus, nos prius moueamur. Verba Ci-

Orat. 2

ceronis hæc sunt. Non me herculè unquam apud iudices, aut dolorem, aut misericordiam, aut inuidiam, aut odium excitare dicendo uolui, quin ipse in cōmouendis iudicibus ijs ipsis sensibus, ad quos illos adducere uellem, permouerer. Neque enim facilè est perficere ut irascatur cui tu uelis iudex, si tu ipse id lentè ferre uideare: neque ut oderit cū quem

quem tu uelis, nisi teipsum flagrantem odio ante uiderit, neque ad misericordiam adducetur, nisi ei tu signa doloris tui uerbis, sententijs, uoce, uultu, collachrymatione deniq; ostenderis. Hæc & alia multa Cicero sub Antoniij persona egregiè disputat.

In genere demonstratiuo historici poëtæq; epilo-
logo non utuntur: orator tamen ad confirmandam
auditorum memoriam non inconcinnè cum ali-
qua delectatione utetur.

In suasorio præcipua totius orationis sunt re-
petenda, affectusq; mouendi, præcipueq; hîc est
amplificandum, & in locos, quos communes uo-
cant, excurrendū: inducendæq; sunt prosopopœiæ
quæ huius generis uidentur esse propriæ. de qui-
bus in elocutione. De qua priusquam dicamus,
pauca de memoria sunt libanda, quæ dispositione
maximè adiuuatur, unde eam quidam dispositio-
nis partem esse dixerunt.

DE MEMORIA.

MEmoria est firma animi rerum ac uerborū
dispositionis præceptio. Rhetores omnes
qui de memoria præcipiunt, huc demum tendūt,
ut ni-

ut nihil ordine ac dispositione certa certius & fidelius esse credant. Quare qui methodo quæ scripserit, ordinari: aut ab alijs scripta methodo ipse collegerit, faciliè quæ uolet memoriæ mandabit. Nunc pauca ex Quintiliano subtexamus, qui plura uolet, ipsum adeat.

Memoria sicut alia omnia excolèdo augetur.

Plurimum ualet diuifio & recta compositio, nam qui rectè diuifit, nunquam in rerum ordine errare poterit.

Proderit & per partes ediscere: & hæ partes non sint perexiguæ.

Non erit inutile aliquas in margine apponere notulas, ut anchoram si de naui sit dicendum, spiculum si de prælio.

Inuat plurimum iisdem quibus scripseris charactis ediscere.

Nox interposita plurimum habet firmitatis. Hæc ex Quintiliano. lib. 11. cap. 2

Nec audienda tantum, sed uidenda etiam sunt quæ memoriæ mandare uelis: nam uisu magis quàm auditu excitantur animi.

Coriandri grana saccaro induta (confites uulgo dicunt) post cibum assumpta, fumos ascendentes prohibent, undè memoriæ conducunt.

Vuc

Vux passæ, granulis prius extractis, & per no-
ctem unam in aqua vitæ maceratæ, maneq; in ci-
bum sumptæ cum eadem aqua firmant egregiè
memoriam.

Postremò nil unquam memoriæ mandes, quod
non ad unguem intellexeris.

DE ELOCUTIONE.

Elocutio propria pars Oratoris est, quod & Ex Orat.
nomen ipsum indicat: non enim inuentor, aut
cōpositor, aut actor hæc complexus est omnia, sed
& Græcè ab eloquendo Rhetor, & Latinè Elo-
quens dictus est. Cæterarum enim rerum quæ sunt
in oratore, partem aliquam sibi quisque uendicat:
dicendi autem, id est eloquendi, maxima uis soli
huic conceditur.

Elocutio est orationis exornatio: cuius duæ
sunt partes, Tropus, & Figura.

DE TROPIS.

Tropus est elocutio in singulis uerbis, qua pro-
pria significatio in aliã mutatur. Cumq; o-
mnis mutatio propriæ significatiõis sit aut ex cau-
sis ad

D E A R T E

sis ad effecta, subiectis ad adiuncta, ex comparatis ad comparata : ex oppositis ad opposita: ex toto ad partem : aut contrā: quatuor tantum existunt genera troporum. Metonymia, Metaphora, Ironia, Synecdoche.

Metonymia est mutatio significationis ex causis ad effecta, & subiectis ad adiuncta. & contrā. Hanc (inquit Cicero in Oratore) hypallagen rhetores, quia quasi summutantur uerba pro uerbis: metonymiam grammatici uocant, quod nomina trāsferantur. Primus eius modus est, cum ex causis effecta significamus. Terent. Sine Cerere & Libero friget Venus. sic Mars pro bello, Vulcanus pro igne. Itaq; inuentor pro re iuuenta, aut cui præsidet ponitur: & materies pro materiato, nam materia causa est, Vt. ferrum pro gladio, pinus pro naui. Virg. A Ere ciēre uiros, Martemq; accendere cantu. Secundus modus poētis est familiarior, cum significare uolunt ex effectis causas. Virg. Pallentesq; habitant morbi, tristisq; senectus. Horatius. Pallida mors æquo pulsat pede pauperum tabernas, regūq; turres. Tertiū modus, cum nomen proprium subiectæ rei ad significandam rem adiunctam traducitur: ut continens pro contento. Virg. Illa inelyta Roma imperium

Eunu.

AEne. 6

AEne. 6

Carm. 1

AEne. 6

rium terris, animos æquabit Olympo. Sic Italia pro Italis, Sicilia pro Siculis, carcer pro uinctis. Sic etiam epotum calicem dicimus, & benè moratæ urbes. Huc etiam pertinet cùm possessorē pro re possessa ponimus. Terent. Eamus ad me. Virg. Eunu. Iam proximus ardet Vcalegon. Quartus mo= AEne. 2
 dus, cùm ex adiunctis res subiectas intelligimus. Terent. Vbi ille scelus est qui me perdidit? Scelus, And. pro Scelesto. Ouid. Credula res amor est. i. amator. Virg. Quid non mortalia pectora cogis, Au= Epist. 6
 ri sacra fames? Sic dicimus quo non penetrat auaritia? Fides ualuit, iustitia confecit. Quintus AEne. 3
 modus ex superioribus compositus, cùm adiunctū pro alio adiuncto sumitur, idq; non uno modo: nā sunt aliquando duo epitheta duobus subiectis adnexusa, improprie tamen, nisi suis subiectis restituantur. Virgil. Ibant obscuro, sola sub nocte per umbras. i. ibant soli, sub obscura nocte. Hic tropus Hypallage dicitur, quoties cōuerso rerum ordine aliquid dicimus. Capitur etiam adiunctum pro adiuncto per synonymiam, quādo duo nomina cōueniūt in una significatione, sed illorum alterū aliud præterea significat. ut seuus & immanis idem significant, sed & immanis etiam significat ingens: ut immania templa. Cùm ergo seuus pro ingenti sumitur,

D E A R T E

- AEne.1** mitur, est metalepsis. Virg. Sæuus ubi AEacidae
AEne.12 telo iacet Hector. Idem. Nec minus AEneas ma-
 ternis sæuus in armis. Sic dixit Idem numina læ-
Gcor.4 ua, pro sinistra. Nam sinister à uerbo sino, pro-
AEne.2 sperum significat in augurijs. Et, Intonuit læuum.
 Ridiculum autem est quod affertur à commenta-
Odysf.1 toribus quæ Dijs dextra sint, eadē nobis esse læua,
 aut contrā. Homerus, ut sæpè monet Plutarchus,
 plurimus est in metalepsi: uocat enim insulas uelo-
Ilia.10 ces, cū uelit acutas intelligere: quia acutum
Odysf.12 utramq; significationem complectitur. uerba Græ-
 ca hoc melius declarant, Thoos, & Oxis. Idem ue-
 locem appellat noctem, quòd umbra terræ sit acu-
 ta: authore eodem Plutarcho. Virgilius etiam tri-
 stes appellat lupinos. hoc est amaros. Nam ama-
Epodo.2 rus tristem etiam significat. ut hostis amare quid
 increpitas? Horat. Libet iacere modò sub antiqua
 ilice. antiqua. i. magna ac proinde umbrosa. Est
 enim hoc aliud metalepsis genus, quādo gradatim
AEne.1 itur ad id quod erat propriū. Vir. Spelūcis abdi-
Buc.1 dit atris. i. profundis. Idē. Post aliquot aristas. Nā
 per aristas spicas, per spicas messes, per messes æ-
 states, per æstates annos intelligimus. Sic Cicero
Lib.13 suas in Antonium orationes uocauit Philippicas.
 Sic Martialis coracinū piscem uocauit gloriā pri-
mam

mā gula Pellæ, cū Alexādrinæ uoluisset significā
re: Alexander enim Pellæus Alexandriā condidit.

Metaphora siue translatio est mutatio signifi
cationis ex cōparatis ad cōparata: aut cū ex si
mili simile significamus. ut parturiūt arbores, flo
rescunt genæ, lux ingenij. Huius tropi genera uel
le persequi superuacaneū est, & infinitū: nā tam
latè patet genus hoc quā genera naturæ. Nihil
est enim (ut inquit Cic.) in rerū natura, cuius nos
nō in alijs rebus possumus uti uocabulo & nomi
ne. Vnde enim simile duci potest (potest aut ex o
mnibus) indidē uerbum unū, quod similitudinē cō
tinet, translatū, lumē affert orationi. Hæc Cicero,
qui ibidē latè metaphoræ uitia persequitur, quæ
nos cōsultò relinquimus. Exēplis etiā supsedemus,
quia ita tritus omniū linguis hic tropus est, ut nil
ferè loquamur absq; trāslatione. Metaphora si du
riuscula sit catachresis dicitur, non tamē alijs tro
pus est, imò uerò omnis trōpus rectè appellabitur
catachresis. Cicero certè cū Aristotelē transla
tioni subiūgit. Virg. Instar montis equum diuina
Palladis arte edificant. Et cū grādem orationē
pro magna, minutum animū pro paruo dicimus,
aut cū pro uirtutibus uicina uitia ponimus: ut pro
forti audacem, pro prodigo dicimus liberale. Hūc

Orat. 3

Orator.
A Enc. 2

D E A R T E

modum metaphora Latini dixere abusione. Si
metaphora multiplicetur, dicetur Allegoria siue
inuersio, nec diuersum genus est à metaphora. Ho-
rat. O nauis referet in mare te noui fluctus? ô quid
agis fortiter occupa portum. Et totus ille locus, in
quo nauis pro republica, portus pro pace, fluctus
pro bellis ciuilibus accipiuntur. Allegoria per-
plexæ et obscurior dicitur ænigma, quanuis pos-
sit esse ænigma sine tropo. Huiusmodi sunt Pytha-
goræ symbola: ignem gladio ne fodito: cor ne edi-
to: hirundinem sub eodem tecto ne alas. Et illa
Virgilij, Dic quibus in terris.

Carm. 1

Eclo. 3

And.
Phil. 3

lib. 9. cap. 2

Ironia siue illusio siue simulatio est mutatio
significationis ex oppositis ad opposita: quia aliud
quàm quod dicit intelligi uult. Terent. E hoc uir bo-
ne uir. Cic. ô præclarum custodem ouium (ut aiunt)
lupum. Hæc aliquando multiplicatur, sed propter-
ea non mutat genus, ut credit Quintilianus, qui
hunc modum inter figuras sententiarum collocat,
adducto etiam simili contra seipsum: Quemadmo-
dum (inquit) allegoriam facit continua metapho-
ra, sic hoc Schema faciat troporum ille cōtextus.
Itaq; continuata ironia tropus est, non figura, nā
tres quatuorue homines non aliud faciunt anima-
lis genus quàm unus, nec numero rerum genera,
sed

sed natura sunt distinguenda. Terent. Scio : cum And.
 patre altercasti dudum, & is nunc propterea tibi
 succenset, neq; te quiuit hodie cogere illam ut du-
 ceres. Vir. Egregiam uerò laudem & spolia am AEne. 4
 pla refertis Tuq; puerq; tuus: magnum & memo-
 rabile nomē, Vna dolo diuū si fœmina uicta duo-
 rum est. Mycterismus, Sarcasmus, Asteismus
 idem tropus, diuersa nomina. Cice. Disertissimum Philip. 2.
 cognoui auum tuum, at te etiam apertiore in
 dicendo: ille nunquam concionatus est nudus, tuum
 hominis simplicis pectus uidimus.

Synecdoche est mutatio significationis ex toto
 ad partem, aut contrā. Cū totum & partē dico,
 genus etiam & speciem intelligo. Latine concep-
 tio siue intellectio dicitur. Fit quatuor modis. Pri-
 mus cū totum pro parte capitur. Virg. Prius= AEne. 1
 quam pabula gustassent Troie, Xanthumq; bibis-
 sent. i. partem aliquam Xanthi fluuij. Secun-
 dus cū pars pro toto. ut, tectum pro domo: pup-
 pis pro naui: mucro pro gladio. Tertius cū
 genus pro specie. ut, poëta pro Homero, seu Vir-
 gilio: Orator pro Cicerone: Priamides pro He-
 ctore. Hic modus proprium habet nomen, dicitur
 enim Antonomasia. Huc refer cū numerū plu-
 ralem pro singulari ponimus. Cice. Populo impo Ad Brut.

D E A R T E

Saty. 1

suimus, & oratores uisi sumus. Iuuenal. Et nos ergo manus ferulae subduximus, Quartus cum species

Saty. 2

ponitur pro genere. Iuuenal. Qui Curios simulant, & Bacchanalia uiuunt. Curios dixit pro bonis. Sic dicimus gramen pro herba: Neronem pro crudeli: Cræsum pro diuite: Mæccnatem pro patrone literarum. Huc refer singularem numerum pro plurali. Liuius. Romanus prælio uictor. Hor. Me peritus discet Hiber. i. Hiberi. Hæc de tropis.

Alij tropi enumerari solent, ut hyperbole, periphrasis, Onomatopœia, antiphrasis. Sed hyperbole tropus non est, sed amplificationis genus, ut ocyor euro: leuior uentis: scopulis durior: in quibus tam similitudinibus si aliquando incrit metaphora, dicatur hyperbolica metaphora. Mar. Tu non uitiosus es, sed uitium. Periphrasis argumentum est sub diffinitionem cadens, alio nomine descriptio dicitur, potest effici cum aliquo tropo, aut sine illo. Onomatopœia id est, fictio nominis, ut sybilus, mugitus, bombardæ, quid simile habet cum tropo? Antiphrasis (ut uulgo intelligitur) non solum tropus non est: sed nec aliquid quidem. Nullam enim dictionem adhuc potui reperire quæ per antiphrasim dicatur. Nam bellum, autore Cicerone, ex duello factum est. Quintilianus ridet illos, qui lucum à non

Orator.

à non lucendo deducunt. Parca teste Varrone à partu dicuntur, quòd præsent partubus. Eumenides teste Suida, dictæ sunt furia ex tēpore quo mites & piæ à Pallade sunt redditæ in Crestis iudicio. testēq; citat AEschylū in Eumenidibus. Si tamen dictio hæc, antiphrasis, rectè intelligatur, ironiæ quædā est forma, qua cōtrariū ei quod dicimus significamus: ut autor est Plutarchus in Homerum. ut cū dicimus, nō malus author, pro bono. Virg. AENE. 7
Munera nec sperno. Idē Nec mihi displiceat ma- Geor. 3
culis insignis et albo. i. placebit. Sed ad figuras transeamus.

D E F I G U R I S S E N- tentiarum.

Figura est elocutio, qua oratio à uulgari cōsuetudine mutatur. Græci schema uocāt. i. habitū et quasi gestū orationis. Eius duo sunt genera: unū sententiæ, alterum uerbi seu dictionis. Figura sententiæ est in totius orationis comprehensione: & idcirco mutatis uerbis omnino retineri potest. Hoc enim Cicero discriminis esse dicit inter con- Orat. 3
formationes uerborū & sententiā: quòd uerborū tollitur, si uerba mutaris: sententiā permanet, quibuscunq; uerbis uti uelis. Figure sententiārum

D E A R T E

in quatuor genera distingui possunt: primum in petitione aut responsione: secundū in fictione: tertium in abruptione; quartum in amplificatione. Non quòd hæc genera sint Schemata, sed quòd in his quædam figurarum inter se sit communio. Primum igitur genus est aut in petitione, aut in responsione, aut in utraq; positum. Simplicis petitionis genera quatuor sunt; Optatio, deprecatio, addubitatio, & communicatio.

Philip. 2. Optatio est uoti significatio. Cice. Vtinam aliquando dolor populi Ro. pariat, quod iã diu par turit. Virg. Sic tua Cynæas fugiant examina ta=

Eclo. 9 xos. Et cū imprecamur. Terent. Vt te quidem

Heaut. dij deæq; omnes cum istoc inuēto perduint. Et cū salutamus. Virg. Salue fatis mihi debita tellus.

AEne. 7

Pro Rab. per. Deprecatio est apostrophe cum precibus. Cic. Ab Ioue Optimo Max. ceterisq; dijs immortalibus pacem ac ueniam peto. Et cū inuocamus.

AEne. 1 Virg. Musa mihi causas memora. Nec solū ad deos & homines refertur deprecatio, sed ad res alias. Cic. Vos enim Albani tumuli atq; luci, uos, inquam, imploro atq; obtestor, uosq; Albanorum obrutæ aræ sacrorū populi Ro. sociæ & æquales.

Pro Mil. Addubitatio est affectus solicii & in consiliij perturbatione hæsitantis. Hinc exorsus est Cice

ro diuinam Philippicam: Quónam meo fato fieri dicam. Idem. Quid primum quærar? aut unde Pro Rosc. potissimum ordiar? aut quod: aut à quibus auxiliū A. petam? deorūne immortalium? Populīne Rom? uestrāne: qui summam potestatem habetis, hoc tempore fidem implorem?

Communicatio est cum alijs quædam consultatio: & præcipuè cum aduersario. Differt à superiore, quòd illic apud nos metipsos: hīc cum alijs rationem inimus. Cice. Tu denique Labiene quid Pro Rab. faceres tali in re, ac tempore? cum ignauie ratio Per. te in fugam atque latebras impelleret: improbitas & furor L. Saturnini in Capitolium arcesseret: consules ad patriæ salutem, ac libertatem uocarent: quam tandem authoritatem, aut quam uocē, cuius sectā sequi, cuius imperio parēre potissimū uelles? Simplicis petitionis hæc sunt genera. In simplici responsione duo tantum sunt: permissio & concessio.

Permissio in facti rei; alicuius condonatione eleganter usurpatur. Cice. Licet impunè per me In Vatīn. parietes in adolescentia perfoderis, uicinos compilaris, matrem uerberaris, habeat hoc præmium tua indignitas, ut adolescentiæ turpitudine obscuritate & sordibus tuis obtegatur. Hæc figura sæpè

D E A R T E

- ab ironia petit ornatū, quia cōtrarium eius quod
Æne. 4 permittimus, intelligi aut fieri uolumus. Vir. 1. se
 quere Italiam uentis, pete regna per undas. Te=
Adelph. rē. Profundat, perdat, pereat, nihil ad me attinet.
 Concessio cum id quod cōceditur stat à nobis,
Verr. 7 aut certè nō nocet, & aduersariū urget. Cice. Sit
 sacrilegus, sit fur, sit flagitiorū omniū uitiorumq;
ProLigar. princeps: at est bonus imperator. Idē. Habes igitur,
 Tubero, quod est accusatori maximè optan=
 dū, consitentem reū. &c. Differt hæc figura à su=
 periore, quòd illa in factis: hæc in dictis & argu=
 mētis est. cum aliquid damus, quod alius sibi cōce=
 di postulat. Nūc in petitione & respōsione simul
 figuras enumeremus, prolepsin & subiectionem.
 Prolepsis est alicuius quæstionis respōsio et an
Pro Rosc. tē occupatio. Spectatur plerūq; in procæmij. Cic.
Amer. Credo ego uos, iudices, mirari quid sit, quòd cum
 tot summi oratores, hominesq; nobilissimi sedeāt,
 ego potissimū surrexerim, qui neq; atate, neq; in=
 genio, neq; autoritate sim cū ijs qui sedeāt cōpa=
Act. 1 randus. Deinde subdit causas. Idē in Verrē. Si quis
 uestrū, iudices, aut eorum qui adsunt, fortè mira=
 tur. Idē pro Calio. Si quis fortè nūc adsit ignarus
 legū. Fit etiā in alijs partibus orationis. Idē in ea=
 dē. Dicet aliquis: hæc igitur est tua disciplina? sic
 tu

tu instituis adolescentes? Ob hanc causam tibi hunc puerum parens commendauit & tradidit, ut in amore & uoluptatibus adolescentiam suam collocaret?

Subiectio est prompta & expedita redditio ad id quod proponitur. Cic. Quid enim tam com- *ibidem.*

mune quam spiritus uiuis, terra mortuis, mare fluctuantibus, litus eiectionis? Ita uiuunt dum possunt, ut ducere animam de coelo non queant: ita moriuntur, ut eorum ossa terram non tangant: ita iactantur fluctibus, ut nunquam alluantur: ita postremo eiciuntur, ut ne ad saxa quidem mortui conquiescant. Idem. Quod bene cogitasti aliquando, laudo: Philip. 2.

quod non indicasti, gratias ego: quod non fecisti, ignosco: uirum res illa querebat. Idem. Vocat, ut- *Parad.*

niendum: poscit, dandum: eicit, abeundum: minatur, extimescendum. Idem. Cur dixisti testimoniū *Pro Syll.*

in alios? Quia coactus. Cur damnati sunt? quia creditum est. Ex testimonijs citatis colliges hanc figuram dupliciter tractari: aut enim multa prius enumeramus, deinde subiicimus: aut unicuique enumerationi suam subiectionem opponimus. Hec de primo genere figuræ in petitione & responsione: nunc de secundo genere quod in fictione uersatur. Hec autem fictio est aut personæ, aut rei: illa Prosopopœia, hæc Præteritio dicitur.

Pro-

D E A R T E

Prosopopœia, siue sermocinatio est ficta personarum inductio, per quam res, cuiuscunq; generis sint, uocem & sermonem possunt accipere. Hæc aut recta est, aut obliqua. Recta est quando ficta persona uerba sibi data prosequitur. Obliqua uerò quando nos ea dicimus, quæ dici potuissent uideantur à persona ficta. Exempla rectæ prosopopœiæ sunt omnes orationes, quas personis tribuunt poëtæ aut oratores. Virg. dixitq; nouissima uerba:

Ænc. 4.

Dulces exuuiæ dum fata, Deusq; sinebant,
Accipite hanc animã, meq; his exoluite curis.
Vixi: & quæ dederat cursum fortuna peregi,
Et nunc magna mei sub terras ibit imago.

Deinde uno uerbo prosopopœiam conclusit: Dixit. Sic Cicero patriam inducit expostulantem cū Catilina: Siciliam cum Verre. Tragicæ, Comœdiæ, Dialogi, & dialogismi in hoc genere sunt composita. In quibus seruari decorum maximè oportet, hoc est, ut ficta persona dicat, quod si uiua aut præsens adesset, diceret. Nam idcirco ab alijs Ethopœia dicitur, quòd mores alienos ad uiuum effingat. Huc etiam refertur Mimesis, quæ dicta tantum aliena representat. Quale est illud Phædræ uocem Thaidis et uerba imitantis. At

Eunuc.

ego

ego nesciebam quorsum tu ires: Paruola hinc ab-
 repta est, eduxit mater pro sua, soror est dicta: cu-
 pio abducere, ut reddam suis. Prosopopœia mirè
 uariat orationem. Nam illa aduersariorum cogi-
 tationes uelut secum loquētium protrahimus, quæ
 tamen à fide non abhorreant. Et nostros cū alijs
 sermones & aliorum inter se credibiliter intro-
 ducimus. Et suadendo, obiurgando, querendo, lau-
 dādo, miserando personas idoneas damus. Formas
 quoq; fingimus, ut Famam Virgilius: Voluptatem
 ac Virtutem Prodicus apud Xenophontē. Ob-
 liquæ prosopopœiæ exempla multa sunt in Cæsa-
 ris commentarijs, nunquam enim illic recte ponū-
 tur conciones, sed quid potuit aliquis dixisse, obli-
 quo sermone describitur: quod propriū historiæ
 est, ut asserit Trogius Pōpeius, qui Liuium & Sal-
 lustium reprehendit, quòd conciones directas, pro
 sua oratione operi suo inserēdo, historiæ modum
 excesserint.

AENE. 4.

IUSTINUS.
lib. 38

Præteritio, seu prætermisio, Græcè Paralepsis,
 uel Apophasis, est cū dicimus id quod fingimus
 uelle prætermittere. Cic. Nec ea dico, quæ si dicā, Verr. 1
 tamen infirmare non possis, te antequam de Si-
 cilia decesseris, in gratiam rediisse cum Verre.
 &c. Idem. Mitto illam primam libidinis iniuriā: Pro Cluē.
 mitto

mitto nefarias generi nuptias:mitto cupiditate ma-
tris expulsam ex matrimonio filiam: &c. Virg.

AEne.10

Quid repetā exustas Erycino in litore classes?

Quid tempestatum regem, uentosq; furentes,

AEolia excitos? aut actam nubibus Irim?

Huc pertinent simulationes illæ quæ ad augen-
dū id quod dicitur adhibentur,cū fingimus rē tan-
tam esse,ut uerbis exprimi non possit:aut longius
tempus ad dicendū postulet. Cic. Dies iā me defi-

Pro Cæl.

ciet,si quæ dici in hanc sententiam possunt,coner-
expromere:de corruptelis,de adulterijs, de pro-

AEne.1

teruitate,de sumptibus immensa oratio est. Virg.

O dea,si prima repetens ab origine pergam,

Et uacet annales nostrorum audire laborum:

Antè diem clauso componet uestper olympo.

Sed iam tertium genus aggrediamur,quod in ab-
ruptione sermonis cernitur. Cuius quatuor sunt
formæ. Digressio, Auerasio, Reticentia, Correctio.

Digressio,est à re proposita in aliam,non ta-
men alienam prorsus,abruptio:quæ si longior est
à Græcis Parecbasis dicitur: si breuis Parêthesis.
Digressio longior frequenter aliqua præfatione
præmunitur, ne incōsiderati & imprudētes alias
res agere uideamur:& cū tota excursio facta
est,sæpè adhibetur clausula,quæ reditum signifi-

cat

cat ad id unde egressa erat oratio. Cic. in Verrē, Act. 6
lōga & elegāti oratione Siciliā & Syracusas de
pingit. Sallustius in Iugurthino de Philenorum
aris non iniucundam texit narrationem, sed à do-
ctis reprehenditur, quòd nihil ad historiam. Pa-
renthesis exempla ubiq; occurrunt. Virg. Eclo. 9

Vare tuū nomē (superet modò Mantua nobis
Mantua uæ misera nimium uicina Cremonæ)
Cantantes sublimè ferent ad sidera cygni.

Auersio Gracè Apostrophe, est mutatio siue ab-
ruptio sermōis à recto & naturali cursu ad aliud
quippiam. ut ad Deum, cœlum, terram, homines,
solitudines, sidera, lucos, syluas, & ad seipsum.
Virg. Infelix Dido, nunc te fata impia tangunt? AEnē. 4
Interdum uerò ad incertam personam nos con-
uertimus: ut Dido apud Virg. AEnc. 4

Exoriare aliquis nostris ex ossibus ultor,

Qui face Dardanios, ferroq; sequare colonos.
Reticentia, Aposiopesis, est abruptio, qua pars
aliqua sententiæ reticetur: et oratio quasi abrūpi-
tur. Terē. Egōne illā? quæ illum? quæ me? quæ nō? Eunū.

Vir. Quos ego. sed motos præstat. &c. Idem. AEnc. 1

Ecquis erit mecū iuuenes qui primus in hostem. AEnc. 9

Correctio est propositæ sententiæ reprehensio
& emendatio. Cic. Italiam ornare, quàm domum
suam

D E A R T E

AEne. 2

suam maluit: quanquam Italia ornata domus ipsa mihi uidetur ornatio. Huc pertinet sui ipsius reuocatio. Virg. Sed quid ego hæc autem ne quicquã ingrata reuoluo? Quid ue moror? Correctio etiam unius uerbi est, ut suo loco dicetur. Sed ad quartum genus transeamus, cum res amplificantur. Cuius sunt tres formæ, Exclamatio, Sustentatio, Licentia.

Pro Milo.

Exclamatio, est orationis uehementior elatio. Si gnũ eius: ô, prô. heu, cheu, En. Cic. O frustra suspecti mei labores, ô spes fallaces, ô cogitationes inane meæ. Interdum illudit. Cic. O præclarum cum

Phil. 3

Pro Ligar.

stodem. Habet interim admirationem. Cic. O clementiam admirabilem! Admittit & commiserationem. Vir. En quo discordia ciues Perduxit miseros, en quis consecuimus agros. Huc denique referuntur acclamationes, Gracè Epiphonemata cum

Eclo. 1.

AEne. 1

Geor. 2

Epist. 2

Orat. 1

his ferè signis: tantus, adeò, sic, usque eo. Vir. Tantæ molis erat Romanam condere gentem. Idem. Adeò in teneris consuescere multum est. Horat. Sic leue, sic paruum est animum quod laudis aurum Subruit, aut reficit. Cic. Usque eo illa quæ dicenda de iustitia putabat, à uitæ consuetudine, & à ciuitatum moribus abhorrebant.

Sustentatio, est suspensio sententiæ quæ suspendit

dit animos, ut aliquid maius aut minus obijciat in-
opinatū. Plurimus est in hac figura Martialis: ut Lib. 1
illud ad Pastorem.

Credis ob hoc me, Pastor, opes fortasse rogare,

Propter quod uulgus, crassaq; turba rogat:

Vt Setina meos consumat gleba ligones.

Et sonet innumera compede Tusculus ager:

Vt Mauri Libycis centum stent dentibus orbes,

Et crepet in nostris aurea lamina toris:

Nec labris nisi magna meis crystallae terantur,

Et faciant nigras nostra falerna niues:

Vt Canusinatus nostro Syrus asserere sudet,

Et mea sit cultro sella cliente frequens:

Aestuet ut nostro madidus conuiuia ministro,

Quem permutatum nec Ganymede uelim:

Vt lutulenta linat Tyrias mihi mula lacernas,

Et Massileum uirga gubernet equum.

Est nihil ex istis: superos, ac sidera testor.

Ergo quid? ut donem, Pastor: & edificem.

Dicitur hæc etiam figura Paradoxon, quia ferè
semper præter opinionem concludit. Mart. lib. 11

Mentitur, qui te uitiosum, Zoile, dixit.

Non uitiosus homo es, Zoile: sed uitium.

Licentia, Parrhesia, est orationis libertas atq; si-
ducia liberius affectum mentis exprimens. Cice.

F Quid

ProLigar. Quid aliud egimus, Tubero, nisi ut quod hic pos-
 ste nos possemus. Hac sæpè figura utitur Cicero
 in prima & secunda Philippica. Haftenus de fi-
 guris sententiarum in quatuor genera diducta-
 rum: nunc ad uerborum figuras transeamus.

DE FIGVRIS VER-
 borum.

Figuræ uerborum non spectantur in orationis
 sententia, sed in conformatione, & concinnita-
 te uerbi unius, aut multorum: & idcirco mutatis
 uerbis figura non permanet. Diuidi possunt in
 tria genera, Repetitionem, Commutationem, &
 Numerum. Figuræ uerborum in repetitione de-
 cent sunt.

Adelph. 1 Epanaphora, Epibole, Anaphora, est cum ab
 eodem principio ducitur sæpius oratio. Terẽ. Pri-
 mus sentio mala nostra: primus rescisco omnia:
 primus porro obnütio: agrè solus, si quid fit, fero.
Geor. 4. Vir. Te dulcis coniunx, te solo in littore secum,
 Te ueniente die, te decedente canebat.

2 Antistrophe, Epiphora, Epistrophe, Conuer-
 sio, qua idem uerbum sæpius in fines conuertitur.
Philip. 2. Cic. Doletis tres exercitus populi Ro. interfectos
 inter-

interfecit Antonius. Desideratis clarissimos ci-
ues? eos quoq; eripuit nobis Antonius. Autoritas
huius ordinis afflictæ est? afflixit Antonius. Idem. In Vatîn.

Quare cum ego legem de ambitu tulerim, ex se=
natusconsulto tulerim, sine ui tulerim, saluis au=
spicijs tulerim, saluaq; lege Helia & Fusia, tu eã
esse legem non putes? Mart. Lib. 12

Capto tuam, pudet heu, sed capto, Maximè, cœnã,

Tu captus alias: iam sumus ergo pares.

Manè salutatum uenio: tu diceris isse

Ante salutatum: iam sumus ergo pares.

Sum comes ipse tuus, tumidiq; antecambulo regis,

Tu comes alterius: iam sumus ergo pares.

Esse scabest seruum: iam nolo uicarius esse.

Qui rex est, regem, Maximè, non habeat.

Cic. Hec Posthume, tu ne es Curij filius? C. Ræ Pro Rab.
birij iudicio & uoluntate filius? natura sororis Pos-
se filius?

3 Epanastrophe, Cœnotes, Symploce. Comple-
xio. ex superioribus composita, quia ab anapho-
ra incipit, & in antistrophen finit. Cice. Quis le- Agrar. 2
gem tulit? Rullus. quis maiorem populi partem
suffragijs priuauit? Rullus. quis comitijs præfuit?
idem Rullus. Idem. Quis eos postulauit? Appius. Pro Milo.
quis produxit? Appius.

D E A R T E

Epist. 1 4 Epizeuxis, est geminatio uerbi in eadem parte sententiæ. Hæc autem aut est continua: cum uerba geminantur nullo medio. Horat. Ociues ciues, quarenda pecunia primum est. Aut est disiuncta: cum in eadem sententia geminantur uerba, sed aliqua dictione media. Virg. Maria undique, & undiq; cœlū. Hæ quatuor enumeratæ figuræ sunt in eadem sententiæ parte: sex quæ sequuntur in diuersis sententijs conduplicantur.

Eclo. 10 5 Anadiplosis. repetitio uerbi in fine unius sententiæ, & alterius principio: estq; ut superior, aut cōtinua aut disiuncta. Virg. Vos hæc facietis maxima Gallo: Gallo, cuius amor. Idem. Vare, tuum nomen, superet modò Mantua nobis, Mantua uæ misera.

AEne. 1 6 Circulus cum iisdem uerbis clauditur, quibus incipit oratio. Virg. Multa super Priamo rogitant: super Heclore multa. Idem. Ambo florentes ætatibus, Arcades ambo. Vide Martialem libro. 9 circa finem ad Iulium.

Eclo. 7 7 Epanalepsis, Resumptio, cum post aliqua multa interposita, perspicuitatis gratia, resumimus quod in principio collocauimus. Virg.

Eclo. 8. Talis amor Daphnin, qualis cum fessa iuuenē Per nemora, atq; altos quæredō bucula lucos
Propter

Propter aquæ riuum uiridi procūbit in herba
 Perdita: nec seræ meminit decedere nocti:
 Talis amor teneat: nec sit mihi cura mederi.

8 Epanodos, quæ semel proposita iterat, Latine
 regressio. Ouid. in epist.

Demophoon, uentis & uerba & uela dedisti:
 Vela queror reditu, uerba carere fide. Virg. AEnc. 2
 Iphitus & Pelias mecum: quorū Iphitus æuo
 Iā grauior, Pelias et uulnere tardus Vlyssis. Idē. Eclo. 7
 Cōpulerātq; greges Corydō et Thyrsis in unū
 Thyrsis oues: Corydon distentas lacte capellas.

9 Ploce, traductio. cū nullo ordine eadem uer-
 ba repetuntur. Horat. Isne tibi melius suadet, qui Epist. 1
 ut rem facias, rem si possis rectè, si non, quocunq;
 modo rem? Vir. Non erit auxilio nobis Aetolus, AEnc. 11
 & Arpi: At Messapus erit.

10 Polysyndeton, coniunctionum repetitio siue
 multitudo. Virg. Tectumq; larèq; Armaq; Amy Geor. 3
 cleumq; canem, Cressamq; pharetram. Hæc figu-
 ra parū aut nihil differt à superiore. Sed de fi-
 guris quæ fiunt per repetitionē hæc sint dicta: nūc
 de his quæ per commutationem fieri solent, dispu-
 temus. Cernitur autem hæc commutatio in ordi-
 ne, casu, & significatiōe. Ordinis figuræ duæ sunt:
 Climax, & Antimetabole.

D E A R T E

- Climax, gradatio, est commutatio ordinis, in qua non antè ad consequens uerbum descenditur, quàm ad superius cursum est, Cic. Si debuisset, petijsses statim: si non statim, paulò equidem pòst: si non paulò pòst, at aliquando. Idem. Nec uerò se populo solùm, sed etiam senatui commisit: nec senatui modò, sed etiam publicis præsidijs & armis: neq; his tantùm, sed etiam potestati, cui senatus totà rēp. cōmisit. Virg. Torua leana lupū sequitur, lupus ipse capellā. etc. Sorites fit semper in hac figura.
- Antimetabole, commutatio siue inuersio sententiæ, cū uerba declinata repetantur. Horat. Et mihi res, non me rebus submittere conor. Fortuna chara est artū, ars quoque fortunæ. Non ut edam uiuo: sed ut uiuam edo. In casus commutatione sunt tres figuræ.
- Polyptoton, cū eiusdem nominis aut uerbi casus uariantur. Cice. Certus locus, certa lex, certū tribunal. Virg. Littora littoribus contraria, flum. etibus undas Imprecor arma armis, pugnent ipsiq; nepotes. Idem.
- Ab Ioue principium musæ: Iouis omnia plena: Ille colit terras: illi mea carmina curæ.
- Homæoptoton. similiter cadens, quando clausulæ finiuntur casibus similibus. Cū casus dico, non
- Pro Quin.
- Pro Mil.
- Eclog. 2.
- Epist. 1.
- Verr. 7.
- AEne. 4.
- Eclo. 3.

non solum de nominibus intelligo, sed de reliquis etiam partibus orationis. Cic. Cum tristibus seuerè, cum remissis iucundè, cum senibus grauerè, cū iuuentute comiter. Idem. Domuisti gentes immanitate barbaras, multitudine innumerabiles, locis infinitas, omni copiarum genere abundantes.

Pro Cel.

Pro Mar-
cello.

Homœoteleuton similiter desinens, quando sibi clausule consonando respondent. Cice. Quis in uoluptatibus inquinatior? quis in laboribus patientior? quis in rapacitate auarior? quis in largitionibus effusior? In commutatione significationis duæ sunt figuræ Paronomasia & Correctio.

Pro Cel.

Paronomasia, id est nominatio, est mutatio in uerbum simile. Teren. Nam inceptio est amentium, haud amantium. Cic. En cur magister ex aratore arator factus est. Idem. Non modò uincere, uerum etiam uincire oportet.

And.

Phil. 3

Arusp. R

Correctio commutatio est in uerbo, cum ipsum reprehenditur. fit aut duobus modis. nã si antequã efferatur, corrigitur: dicitur Prodiorthosis. Ter. De hinc postulo, siue equũ est, te oro Daue. Cice. Nõ iã leuitatis est, sed, ut quod sentio dicã, dementiae. Aut fit cum iã effatũ uerbũ est. Et dicitur Eporthosis. Cic. O hominẽ fortunatũ, qui huiusmodi nuntios, uel potius pegafos habeat. Teret. Filiũ

Phil. 5

Pro Quin.

Hcaut.

D E A R T E

unicum adolescentulum habeo: ab, quid dixi habere me, inio habui. Retulimus hanc figuram inter sententias, quia utriusq; partis est. Sed ad numeros transcamus.

D E N U M E R I S:

DE repetitione & commutatione, & uno uerbo, de pleonasmō diximus, restat ut de tertia parte figuræ uerborum dicamus, quæ in numero, siue uerborum collocatione cernitur, per quam oratio suauiter, & modulatè componitur.

Numerus est modulata orationis compositio, quæ in incis, membris, periodis spectatur.

Incisum siue Comma, est imperfecta sententia, in octo syllabas propemodum excurrent, ut ait Hermogenes: siue ut inquit Cicero, in duos pedes & semis. ut, Antequam de rep. dicam ea,

Philip. 1.

Membrum siue cōlum est perfecta quidem sententia, sed aliò tamen relata: excurrent ad magnitudinem ferè carminis heroici. (Quòd si longius excedat, dicitur cōlum Schœnbtēnes, orationum procemijs & magniloquentiæ accommodatum) ut, Antequam de rep. dicam ea, quæ dicenda hoc tempore arbitror:

Perio=

Periodus, ambitus, circuitus, comprehensio, cō-
 tinuatio, circumscriptio (his enim nominibus uti-
 tur Cicero) est perfecta & absoluta sententia.
 ut, Antequam de rep. P. C. dicam ea, quæ dicen-
 da hoc tempore arbitror: exponam uobis breui-
 ter consiliū & profectiois & reuersionis meæ.
 Fit autem periodus ex uno colo, quod Schœnote-
 nēs diximus appellari. Cic. Animaduerti, Iudices, Pro Cluēt.
 omnem accusatoris orationem in duas diuisam es-
 se partes. Item. Depressam, cæcam, iacentem do- In Orat.
 mum pluris quàm te, quàm fortunas tuas aestima-
 sti. Fit ex duobus, & periodus dicolos dicitur. ut.
 Non is solum gratus debet esse, qui accepit benefi- De prou.
 cium: uerum etiam is, cui potestas accipiēdi fuit. conf.
 Quod si duo membra sint inter se paria, Isocolos
 periodus dicitur, aut compar. ut. Si laus allicere Pro Mil.
 nos ad rectè faciendum non potest: nec metus qui-
 dem à fœdissimis factis potest auocare. Item. Nā
 ut locus sine portu nauibus esse non potest tutus:
 sic animus sine fide stabilis amicis esse non potest.
 Fit etiam ex tribus membris, & tricolos dicitur.
 ut, In prælio mortem pater oppetebat: domi filius
 nuptias comparabat: hæc omnia graues casus ad-
 ministrabant. Fit deniq; ex quatuor, & tetracolos
 dicitur. Cic. Si quantum in agro locisq; desertis au Pro Cecin.

audacia potest: tantum in foro atq; in iudicijs impudentia ualeret: non minus in causa cederet Cecinna Ebutij impudentiae: quàm tum in ui facienda cessit audaciae. Quod si ultra procedat, iam non periodus, nec circūscripta dicitur oratio, sed Pneuma. i. quantum uix uno spiritu pronuntiare possimus. Quale est initium pro Milone. Et si uereor Iudices. &c. Et Titi Liuij compositio. Periodis non utemur ubi acriter, instanter, & pugnaciter dicendum erit: sed incisus, aut membris. ut. Abijt, excessit, erupit, euasit. Item. Vicit pudorem libido: timorem audacia: rationem auersantia.

Pro Cluē.

Numerus autem aut est naturalis, aut artificiosus: uterq; uerò aut poëticus aut oratorius.

Naturalis numerus est positus in aurium iudicio. Hinc illae observationes uitandae asperitatis literarum, ut, per terricrepas, & uersutiloquas, scabra rubigo. Hinc fugiuntur uocalium hiatus: ut. Ego omni officio ac potius pietate erga te, ceteris satisfacio omnibus. Hinc illa observatio legendorum uerborum pro subiecta materia. aliter enim sonat. (Tityre tu patulae recubans sub tegmine fagi:) aliter, (Stat sonipes, ac frenata ferox spumantia mandit.)

AEnc. 4

Vides duos uersus, quorū uterq; sex habet pedes,

des, uterq; clauditur eodem modo. sed in priore quater auditur. i. litera exilis. nusquā. o. plena litera. sepē. ē. tenuis. r. quæ est aspera tantū bis, idq; cum. e. ut uix audiat. Fugienda etiā sunt caco-phata. ut cæca caligine. In uocabulis longioribus, utendū Syncopa. ut, Sestertiūm, nummūm, amassē. Sunt etiā quædā genera uerborū (inquit Cicero) In Orat. in quibus ipsis cōcinnitas inest: quæ siue casus habent in exitu similes, siue paribus paria reddunt, siue opponūtur cōtraria, suapte natura numero-sa sunt, etiā si nihil est factū de industria. In huius cōcinnitatis consecratione Gorgiā fuisse principē accepimus: quo de genere illa nostra sunt in Miloniana. Est enim hæc, Iudices, non scripta, sed nata lex: quā non didicimus, accepimus, legimus: uerū, ex natura ipsa arripuimus, hausimus, expressimus, ad quā nō docti, sed facti: nō instituti, sed imbuti sumus. Idem paulō pōst. Semper hæc quæ Græci Antitheta nominant, cum contrarijs opponuntur cōtraria, numerum oratorium necessitate ipsa efficiunt, & eum sine industria. Hoc genere antiqui iam ante Isocratē delectabantur, & maximē Gorgias, cuius in oratione plerunq; efficit numerum ipsa concinnitas. Nos etiam in hoc genere frequentes, ut illa sunt in quarto accusationis. Cō-ferte

DE ARTE

ferte hanc pacem cum illo bello : huius pratoris
aduentum, cum illius imperatoris uictoria : huius
cohortem impuram, cum illius exercitu inuicto :
huius libidinis, cum illius continentia : ab illo qui
cepit, conditas : ab hoc qui constitutas accepit, cap-
tas dicetis Syracusas. Hæc ille de naturali nume-
ro : cuius discrimen aures metiuntur , quæ plena
sentiunt, & parum expleta desiderant, asperis of-
fenduntur, lenibus mulcentur, contortis excitantur,
stabilia probant, clauda deprehendunt, redundan-
tia & nimia fastidiunt, harum deniq; iudiciū est
(ut inquit Cicero) superbiſſimum. Hæc de nume-
ro naturali siue poëtico siue oratorio.

In Orat.

Artificiosus numerus constat ex pedibus . Pes
est dimensio quantitatis, in duabus minimū syllab-
bis. Pedum alij dissyllabi, alij trissyllabi, alij tetra-
syllabi.

Dissyllabi quatuor.	{	Pyrrhichius	uu	Deus
		Iambus	u-	Parens
		Choreus	-u	Solus
		Spondæus.	--	Verax.

Tri=

Trißylla= bi octo	{	Tribrachys	uuu	Dominus
		Dactylus	-uu	Vnicus
		Anapæstus	uu-	Patiens
		Amphibrachys	u-u	Benignus
		Amphimacer	-u-	Excitans
		Bacchius	u--	Iacentes
		Palimbacchius	--u	Solamen
		Molossus	---	Oppressis.

Tetrasyllabi enumerantur. X V I. omnes ta-
men ex superioribus compositi. ex quibus sunt usi-
tatiores.

{	Dichoreus	-u-u	Vitet iram
	Peon primus	-uuu	Viue pius
	Peon quartus	uuu-	Bona gerens
	Dispondeus	----	Præsto mors est.

Hi pedes poëtici sunt & oratorij, sed de numero
poëtico nihil hîc agemus (quanuis non alienus
erat locus) quia diligenter hæc pars à multis est
pertractata.

Oratorius numerus liberior & solutior est,
nec eadem lege semper collocatis utitur pedibus,
imò quantum potest à poëmatis similitudine refu-
git, cum eius uoluptatem aucupetur. Itaq; si uita=
ueris

D E A R T E

ueris in oratione uersum integrum, & in principio orationis principium carminis, itemq; in clausula, clausulam: licet efficias ex quibus libet pedibus numerum: dum ne semper iisdem utare pedibus, quia uarietate mulcentur aures. In omni ergo periodo sunt initium, medium, clausula.

Principia quæ uacuas ingrediuntur aures, numero uacare non debent. Non enim potest placere quod statim quasi in uestibulo offendit. Hi pedes principijs solent esse aptiores.

Creticus, qui & Amphimacer. ut, Neminem uestrum ignorare arbitror. Malui deniq; Peon siue Pæan primus, ut. Qui beneficio uestro. Dactylus, ut, Omnia præteribo.

Anapæstus, qui et Antidactylus, ut, Patior iudices. Molossus, ut. Dum quæ supra uires dicendi.

Media uerò quoniam surdus audiuntur, quàm uel prima uel extrema, paulò negligentius iustrui solent. Sed omnia sic sunt temperanda: primo ne medium, medio ne discrepet imum. Medijs in partibus amplissimus est Pæan primus & quartus.

Extremus periodi finis, quæ propriè clausula dicitur, accuratam postulat diligentiam. Hic enim quiescit, & exoptata numeri iucunditate recreatur auris. Et si quid in oratione uoluptatis est, domina

minatur in fine. Finem autem non solum totius ambitus intelligas, sed etiam incisorum, & membrorum, quæ numerosè terminari iucundum est. Hæc tamen obseruatio nec maior sex aut ad summum septem syllabis esse debet, nec minor tribus. Hi pedes clausulis sunt accommodatiores.

Dichoreus adeò pulchrè cadit, ut hoc. C. Carbo concionem populi Rom. in clamorem excitavit. Et principes Asianorum rhetorum hoc pede ferè clauserint orationem: quod tamen, si sæpè fiat, improbat Cicero. Quia in orationis numero nihil tam uitiosum, quàm si semper est idem. ut Patris dictum sapiens temeritas filij cōprobavit. Et. Penè ab interitu uindicasti. Pœnas persolutas. Creticus cum Dichoreo, ut. Impium semper existimaui. Nam ultima syllaba longa sit an brevis ne in uersu quidem refert.

In Orat.

Iambus cum Dichoreo. Virum cum uiro comparetis.

Dactylus & Dichoreus. Solatia seruitutis. Extæris gentibus imperare.

Spōdæus et Dichoreus. Accepti beneficij cōfessionē Sedes collocare. Utitur hoc sæpè Cicero.

Creticus & Spōdæus, siue (quod idē est) choreus et molossus. Retribuēdi facultatē. Me potissimū esse delectum.

delectum. Depellēdi criminis causa. Hęc clausula familiaris est Ciceroni.

Dichoreus, & Molossus. ut, Pleriq; minimè timē dum fuisse senserunt.

Dactylus et Molossus aliquādo. ut. Esse uidebatur.

Creticus solus, aut (quod idem est) Dactylus sępē cadit. ut. Hęc scripsit diuinitus. Duplicatur interdum. ut. In communionem tuorum temporum con-

tulit. Aliquando triplicatur. Facere enim probus adolescēs, periculose, quā turpiter ppeti maluit.

Tibrachys cum spondæo plurimus & molissimus est in clausulis. Diu multumq; Brute dubitavi. Omnibus fortasse uideatur. Hęc clausulam nō ualdē probat Quintilianus: at exemplorum multitudo apud Ciceronem aliud declarat.

Spondæus iteratus grauitatis plenus est, præcipuē choreo uel Iambo præcurrente. In monumentis maiorum suorum sit interfectus. Etenim palām distitabat, consulatum Miloni cripi non posse, uitam posse. Sed etiam gloriam per tales uiros infringendam. Me consulem declarauit.

Tres spondæi aliquando. Victorijs illustratę sunt. Pietatem testatiorem demonstrarem.

Dactylus & spondæus fugiendi ferē sunt, quia heroici carminis sunt clausule. A Cicerone tamen

non

non semel apponuntur. Omnes in me meosq; re= Pro Milo.
dundant ex illo fonte dolores. Tamen uerbis exte
nuabo. Hæc tanta uirtus ex hac urbe expelletur, Ibidem.
exterminabitur, cijcietur? Si tamen hi pedes non
suis integris dictionibus enuntiantur, nihil fæda=
bunt numerum. ut, Assæqui non potuerunt.

Creticus cum Dactylo usitatissimus est. Neq; ad
consiliū casus admittitur. Distractus à fratribus.
Pæan primus cum Spondeo. ut. Ne tanti facino=
ris immanitas, aut non stetisse, aut non uindicta
esse uideatur.

Spondeus, Molossus, & qui plures longas sor
tiuntur, moram afferunt orationi. His tu proin=
de & colis hexametro lōgioribus utare oportet,
si grauitatem in oratione desideras.

Dactylus, Anapæstus, Tribrachys, & qui plu=
res habent breues, celeritati sunt apti, quemadmo
dum & incisa, atq; breuia membra.

Nec audiendi sunt, qui nullam in his numeris
collocandis subeundam molestiam putant: quam
homines doctissimi & in obseruando & in tradē
do subierunt. Nihil enim (ut inquit Fabius) intra= lib. 9. ca. 4
re potest in affectum, quod in aure, uelut quodam
uestibulo, statim offendit. Nec tibi rursus autor
sum, ut in hac cura consenesceas: sed ut hoc quic=
G quid

DE ARTE

quid est artis, experiaris adolescens, & omnia tra-
has ad usum. Nā (quod in fidibus pulsandis solet
accidere) exercitatione consequēris, ut aptè cadat
oratio, & hanc numerandi molestiam relinquas.

DE PRONVTIATIONE.

Ex Orat.
Perf.

PRONVTIATIO, est apta cōceptæ elocutionis enun-
tiatio. Nec enim alia pronuntiationis est do-
ctrina, quàm elocutionis: nā qualis cogitatio fuit,
talis est pronuntiatio. Eius duæ sunt partes: Vox;
unde pronuntiatio: & gestus, unde actio dicitur.
quarū altera ad aures, altera ad oculos pertinet.
Ac vocis quidē bonitas optanda est, sed tractatio
atq; usus est in nobis. Vocis mutatiōes totidē sunt,
quot animorū, qui maximè uoce cōmouētur. Itaq;
ut cunq; se affectū uideri uolet orator, & animum
audientis moueri, ita certū uocis adhibebit sonū.
Cōtenta igitur uoce atrociter dicet: & summissa
leniter, inclinata grauitè, & inflexa dolēter. In
motu obseruabit, nihil ut supersit in gestu. Status
erectus, et celsus: rarus incessus, nec ita longus: ex-
cursio moderata, eaq; rara: nulla mollitia ceruicū,
nullæ argutiæ digitorū: non ad numerū articulus
cadēs: trunco magis toto se ipse moderans, & uiri-
li laterū flexione: brachij proiectione in cōtentio-
nibus

nibus, cōtractione in remissis. Vultus uerò, qui secundū uocē plurimū potest, quantā affert tum dignitatē, tum uenustatē! In quo cū effeceris nequid ineptū aut uultuosum sit, tum oculorum est quædā magna moderatio. Nā ut imago est animi uultus: sic indices oculi: quorū & hilaritatis & uicissim tristitiæ modū res ipsæ, de quibus agitur, tēperabunt. Est deniq; actio quasi quædā corporis eloquentia. Hæc Cicero. Qui uerò plura uolet, adeat Quintilianū uberrimē de actione differentē. Motus uerò regula sit nobis semper fidus amicus: qui liberē uitia notet. In omnibus deniq; quæ ad actionē pertinent, doctorū semper iudicio, sicut in rebus omnibus, crit adhaerendū. Illud præterea Crasso et Ciceroni maximē placuit, ut in exordio & initio dicēdi cōmouerentur. Qui quāuis optimē dicerent, intelligebant nonnunquam summis oratoribus non satis ex sententia euentum dicēdi procedere: proinde quod aliquando posset accidere, timebant, ne tunc accideret. Simul quia quotiescunq; dicimus, toties de nobis iudicatur. De inde, uelut quandā impudentiā ostētat, qui cū tā graue munus suscipiat, ut silētibus cūctis maximis de rebus sit audiendus, nō saltē hac una recōmouetur, quòd adest ferē nemo, quin acutius atq; acrius

DE ARTE DICEN.

uitia in dicente, quàm recta uideat. Ita quicquid
 est in quo offenditur, id etiam illa quæ laudanda
 sunt obruit. Quare Cicero non solum initijs dicen-
 di aut re uera, aut studiosè commoueri solebat: sed
 id uerbis testificari, nō aspernabatur, ut pro Deio-
 taro. Cùm in omnibus causis grauioribus, C. Cæ-
 sar, initio dicendi cōmoueri soleam uehementius,
 quàm uidetur uel usus uel ætas mea postulare: tū
 in hac causa ita me multa perturbant, ut quantū
 mea fides studij mihi afferat ad salutē regis Deio-
 tari defendendam, tantum facultatis timor detra-
 hat. Homerus quoq; summum illum oratorem
 Vlyssē stetitisse oculis in terram defixis,
 sceptroq; immoto, dicit: antequàm di-
 uinam illam eloquentiæ procellam
 effunderet. Quod & Ouidius
 noster in eodem Vlyssē
 est imitatus. Me-
 tamorpho-
 scos. 13.

L A V S D E O.

FRANCI- sci Sanctij Bro

CENSIS IN INCLYTASAL=

*manticensi Academia rhetorices pro=
fessoris de autoribus interpre=
tandis, siue de exer=
citatione.*



*Aioris esse semper credidi
diligentiæ aliena scripta re=
texere, quàm noua proprio
Marte componere. Nam ut
opus conficias nouum, si fa=
uente natura, præcepta quæ
traduntur à Rhetoribus ca=
pessas: facilis uia erit, facillimoq; negotio, quod ue=
lis indispiscêris. Hinc est, ut sæpè uideamus quos=
dam aut lingue uolubilitate, aut scribendi dexteri=
tate præpollere: quos si ad poëtam quempiam uel*

D E A R T E

oratore[m] explanandū auocaueris: aut obmutescāt
 protinus, suam inscitiā confitentes, aut quod fre-
 quentius est, magno conatu magnas nugas effu-
 tiāt. Quare qui in cōponendo operam suam non
 spernit collocare: in retexēdo aliorū scripta opor-
 tet quoq; laborare. Hæc ratio ab Aristotele dici-
 tur Analysis, qua spectare iubet operis iā confecti
 speciem, nū ad regulas & legem omnia sint accō-
 modata, suisq; omnibus partibus absoluta. Analy-
 sis igitur officiū est totū opus, quod suscepit ex-
 plicandum, à capite retexere: & primum quæstio-
 nē inuenire, hoc est, quid sit id de quo agatur. De-
 inde argumenta quibus id confirmatur, aspicere:
 & ad locos, unde sumpta sunt, referre. Postremò
 dispositionis leges animaduvertere, in illaq; & ar-
 gumentationes, & methodum considerare. Vide-
 req; methodonē doctrinæ, an prudentiæ usus fue-
 rit autor, cuius opus retexitur. Quæ omnia si
 enarratores librorum considerassent, non dubito
 quin sibi & alijs melius consuluissent. Sed ut hoc
 exemplis illustremus, aliquas Horatianas Odas
 excutiamus ex libro tertio, quem hoc anno meis
 auditoribus explicauī: ubi sæpè supinam inter-
 pretum negligentiam sum admirātus. Prima igi-
 tur Oda pro titulo habet: *Varia esse hominum*
ingenia

ingenia uariaſq; fortunas. Quid hoc eſt, aut ubi-
nam id canit Horatius? Longè alia Horatij mens
eſt. Hac enim ſaluberrima Ode docet tutiorem eſ-
ſe uitam illorum, qui paruo contenti uiuunt, quàm
diuitum & regum, quandoquidem omnibus mo-
riendum eſt: neq; amplæ opes & diuitiæ poſſint
aut curas leuare, aut egrotum animum ſanare,
aut ſomnum reducere. Hæc tamen omnia uita te-
nuis præſtat. Hæc igitur eſt exoptanda. In ſecūda
Ode tolerari poterat epigraphe. non tamen omni-
no ſententiam aſſequitur poëta. Cū potius id
ſentiat, quod alibi dixit: Quo ſemel eſt imbuta re-
cens ſeruabit odorem teſta diu. In tertia uerò,
quàm aliena ſunt quæ præponuntur, ab his quæ
ſcripſit Horatius! Cū in illa Oda Romuli ſit apo-
thecoſis, qualem deſcribit Herodianus in principio
quarti. Quarta uerò: Muſarū amicos, docet, tutiſ-
ſimam uitā degere: curæq; Dijs eſſe: quod inductio-
ne probat. Cū ad quintā uentū eſt, fatcor, riſum
non potui continere, cū Auguſti laudes, pro Epi-
graphe legi. Conſului deinde cōmentaria. O Deus
bone, quàm foetide, quàm pueriliter argumēta eli-
ciunt, Auguſtum maiorem eſſe Ioue, quandoqui-
dem Iouem ex fama cognoscimus, Auguſtum ui-
demus præſentem. Cū potius ſit querela contra

D E A R T E

Romanos, qui cum ad decus & libertatem sint natii: non erubescant captiui uiuere à patria procul. Incipit igitur Horatius ab indignatione: Neque credimus Iouem in cœlis regnare: nec Augustus mortalis habetur Deus, & urbis custos: quando hæc flagitia committuntur, ut miles Romanus Persis seruiat; & Carthaginensibus. Sed omnia uelle persequi longum est, omnia enim sunt eiusmodi. Quare inspicienda methodus est: in qua semper Horatius ita fallit auditorem: ut nisi Lynceis contemplare oculis, credas illum centum proposita in satyra una urgere: cum simplex & unum sit, quod unaquæq; satyra uel epistola contineat. Experiamur id in Arte poetica, ad cuius expeditionem cum plures quàm ad uellus aureum properarint, nullus tamen quid auri lateat hastenus demonstrauit, sed lanam externam, eamq; caprinam, pro aureo uellere omnes ostentant. Paucis igitur præceptis perfectum poetam nobis describit Horatius, quæ ordine optimo sunt collocata.

P R I M V M P R A E C E P T V M D E
fine & scopo quem intueri debet poeta.

SIt quod uis scribere simplex duntaxat & unum.
At dicat aliquis: Poeta his legibus non astringuntur:

guntur: liberi enim sunt, quemadmodum & pictores. Falleris, inquit, si ista simpliciter accipis. Quis enim non irrideat pictorem illum, qui cum uirginem pingere destinarit, pulchram ei faciem tribuat, collum equinum, uariisq; plumis obtegit, pictura deniq; in atrum piscem desinat? Eodem igitur pacto poësis reprehenditur, cuius uanæ fingentur species ut, nec pes, nec caput uni reddatur formæ. Quid igitur, dices, habet simile poësis cū pictura? aut unde prouerbum emanauit, Liberi poëtæ & pictores? Dicam, si potero, paucis. Accedit aliquis ad pictorem petens ut in tabella Venerem formosissimam depingat. Num pictor utetur illa sua libertate? & Venerem monoculam effinget, barbatam, obequitatem, manibus hastam tenentem? Minimè, inquis, sed ei reddet illam formam quæ maximè Venerem deceat. Rectè sanè iudicas, nec hîc aliqua pictoris erit libertas: sed in his, qui intabula sunt loci uacui circa Venerem. Nam in illis concessum est pictori, auiculas, flores, arbores, flumina pro arbitrio depingere, neque uitio uertetur illi, si multi uariisq; generis flores ex una radice pullulent (quanquam natura semper est in tuenda) Sic poëta si Achillem cantandum suscipiat, nulla utetur licentia artis, ut nunc timidum,

D E A R T E

nunc fortē describat: aliās pium, rursus deorū con-
temptorem: sed semper idem crit, qualē fuisse ac-
cepimus. Dū tamen huius egregia facta poēta cō-
cinit: pro libito lucū describet, uel flumen, & Dia-
ne aram uel pluuium arcum. Atq; etiam hāc cum
moderamine certa q; lege: non enim semper his
locus est: nam qui non debito loco mihi lucum de-
scribit, aut sēpē id facit, suspicionem ingenerat, ni-
hil illū melius scire: quemadmodum iners ille pi-
ctor, qui ubiq; cupressū appingebat, etiā in naufra-
gijs. Quare danda opera est, ut id quod aggredi-
mur, sit unū, eodēq; tenore procedat. Ineptū enim
figulum iudicabimus, qui amphoram ceperit insti-
tuere, urceolumq; ex suscepta massa confecerit.

S E C V N D V M P R A E C E P T V M.

Sine arte non posse opus procedere.

ITa uitia sunt coniuncta uirtutibus, ut fallāt ocu-
latissimos quosq; nisi arte discernātur. Id probat
inductione. Breuitas uirtus est eximia in oratio-
ne, ut scripsimus cap. de narratione. Hanc uerò
dū sequi cupio, in uitii obscuritatis delabor. Præ-
terea, tres sunt scribendi characteres, teste Cicero-
ne. Nā tenuis & gracilis est stylus, acutus, omnia
docens,

Ex Orat.
Perf.

docens, nō amplificās, subtili quadā & pressa oratione limatus: hūc qui uolūt sectari, ita sese extenuāt, ut sine neruis, sine animis poëmata componāt. Est & alius stylus plenus, cū ampla & sententiārum grauitate & maiestate uerborū, uehemens, uariius, copiosus, grauis, ad permouendos & cōuertendos animos instructus: hunc qui affectāt, si arte careāt, pro grauib; & gradiloquis, turgidi & inflati fiunt. ut. Torua Mimalloneis implerūt cornua bōbis. Ille enim stylus turgidus & inflatus est, nō sublimis. Est & alius stylus interiectus inter medius, & quasi temperatus ex utroque, uicinus amborū, utriusq; particeps, uel potius expers, uno tenore in dicendo fluēs, ornāmētis modicis uerborū sententiārumq; orationē picturans. In quo Virgilius excelluit in Georgicis. Hūc uocat Horatius tutū nimium, timidumq; procellae, ducta metaphora à nauigantibus iuxta litus, qui nec terrā contingunt, nec procellas ingentes perhorrescūt. Sed ita oportet attēperare cursum, ne repat nauis: quandoquidē iuxta litus non ita profunda est aqua, ut nō immineat naui periculū. Ita poëta qui hāc uirtutem indipisci cupit, nec tenet modum, repit & iacet, & indignus est qui legatur. Varietas in super uirtus maxima est in poësi, solet enim
animos

D E A R T E

animos mirum in modum allicere: sed hanc comi-
tatur uitium uel maximum: Nam qui cupiunt ua-
riare rem aliquam, nulla lege aut arte id facien-
tes, portentose delphinū syluis appingunt, fluctibus
aprum, credentes hanc esse ueram uarietate. De-
niq; dum uitium fugimus stulti, in uitium incidimus.
Neq; satis est artem in una alteraue parte calle-
re, cum tot poetæ sint necessaria: nā infelix ille fa-
ber est, qui capillos & ungues ad amusem expri-
mit, si totam statuam nescit partibus suis adapta-
re. Nec ille formosus est, qui nigros oculos ni-
grumq; capillum est sortitus, si tamen deformis
nasus totam oculorum præstantiam deturpat.
Molles capillos dixit cum de ære loquatur, id est,
aptos & ad uiuum depictos. Sic Virg.

AEne. 6
Eclo. 3

Excudent alij spirantia mollius æra. Idem
Et molli circum est ansas amplexus acantho.

T E R T I V M P R A E C E P T V M

De collocatione rerum &
uerborum.

SVmte materiam. &c. Optima dispositione ni-
hil pulchrius. Huic igitur incubat poeta: obser-
uetq; qua methodo sit disponenda materies: dixi-
mus

mus esse methodum prudentiæ, atq; doctrinæ. Horatius prudentiæ ordinem in poëtis probat. Non enim ut quæq; natura prima sunt, ita primùm narranda: sed dicenda primùm, quæ primò dici postulant: pleraq; differenda & in præsens tempus seruanda. præsens tempus uocat proprium, & cōmodam opportunitatem: quædam uerò retinenda & amanda: quædam omnino repellenda. Si quæras quomodo tantam rem assequaris, accipe præceptum. Sumite materiã uestris qui scribitis æquã Viribus, & uersate diu quid ferre recusent, Quid ualeant humeri: nam qui rem de qua dicturus est bene legerit. id est selegerit, & perpenderit, neq; methodo & ordine lucido destituitur, neq; etiam facundia. Omnis autem oratio (ut cum Quintilia lib. 3. ca. 5 no loquar) constat aut ex his quæ significantur, aut ex his quæ significant, id est, rebus & uerbis. Quare Horatius hoc in loco de collocatione simul & inuentione uerborum differit: In uerbis etiam tenuis. &. Quasi dicat in uerbis collocandis memor esto prouerbij, Communia nouè, noua communiter. Nam si ex uerbis tritis & obuijs cuilibet tuã telam texueris, & in collocatione aliã quid ingenij ostenderis, nouus & nitidus apparebis. exempla non longè petantur, nam ipse appo-

suis

suit Horatius, cū iuncturam appellat callidam. Callidum enim, cū de homine dicatur, nouè tribuit iuncturæ. Nouè item ex uerbis tritis dixit.

AEne. 8

Virgilius. Et pontem indignatus Araxes. Hic nulum nomen nouum est: cū iunctura sit noua &

AEne. 7

pulcherrima. Idem. Ferrūque armare ueneno.

Liui. Dec. 3

Addit etiam Horatius licere nouis rebus noua nomina inuenire. M. Cornelius Cethegus Annibalis

Lib. 9. Et

temporibus consul fuit. G. Cornelius Cethegus annis octo post creatus consul & in Hispaniam mis-

Dec. 4. li. 1

sus. X V. millia Hispanorum uno prælio cecidit.

Hi igitur Cethegi (ut coniectari par est) non togati more Romanorum obambulabant, sed ueste militari (quæ cinctus dicitur) induti. Quare Hora-

tius nouum morem nouo uocabulo nominauit: appellauitq; cinctutos. Sed prudēter (inquit) hac utamur licentia. i. semper cum aliqua præfatione tē-

peretur. qualis est: ut ita dicā: ut sic loquar: liceat

sic nominare. Cic. Nam & grandiloqui, ut ita dicam, fuerunt. Et noua fictaq;. Etiam aliquādo: in-

quit, nulla cogente necessitate uerba poteris effingere, non tamen pro libito, sed ex Græcis fontibus deriuata. ut. Rhetorica, Dialectica. Philoso-

phia, triclinium. dica pro lite. acta pro littore.

In Orat.

Virgilius. At procul in sola secreta Troades acta.

AEne. 5

Virgilius. At procul in sola secreta Troades acta.

Hinc

Hinc Martialis carpit AEmilianum, quòd Mistyl Lib. 1
 lum pro coco dixcrit, ductus Homeri uersiculo
 Mistyllon teara teatla, i. secabant sanè alia. Quare
 re inquit Martialis.

Si tibi Mistyllus cocus AEmyliane uocatur:

Dicetur quare non Taratalla mihi? Ergo par-
 cè detorquenda sunt nomina & cum iudicio. Ac
 tandem linguam Latinam ditare cur non licebit;
 uel nulla cogente necessitate, etiã si à Græcis nihil
 mutueris? Nam Cicero primus dixit fauorem, et
 urbanum. Terentius, obsequium. Plautus & En-
 nius multa finxêre nomina. Horatius addidit pro
 exemplo (Inuideor.) Vltimum deniq; præceptum
 circa uerba collocanda est, ut possimus aliquando
 uetusta & obsoleta uocabula renouare. ut prosa-
 piam, pro genere, Olli pro illi, suat, pro sit. indu-
 gredi pro ingredi. Hæc omnia pulchra similitudi-
 ne, & argumentis à minori ductis confirmat:
 usumq; plurimum ualere contendit.

Q V A R T V M P R A E C E P T V M.

Singula quæq; locum teneant for-
 tita decenter.

Roscius apud Ciceronẽ caput esse artis decere, Orator. 1
 solebat dicere: quod tamen unũ id esse: quod
 tradi

In Orat. tradi arte non posset. Et Cicero ipse: Est (inquit) eloquētiæ: sicut reliquarū rerū, fundamentū sapiētia. Vt enim in uita, sic in oratione nihil est difficilius, quā quid deceat uidere. Prepon appellāt hoc Græci, nos dicamus sanè decorum: de quo præclarè, & multa præcipiūtur, et res est cognitione dignissima. Huius ignoratione non modò in uita, sed sapissimè & in poëmaticis, & in oratione pèccatur. Est autem quid deceat oratori uidendum, non in sententijs solum, sed etiam in uerbis. Non enim omnis fortuna, non omnis honos, non omnis authoritas, non omnis ætas, nec uerò locus, aut tēpus, aut auditor omnis eodem aut uerborum genere tractandus est aut sententiarum. Hoc autem in re, de qua agitur, positum est: & in personis & eorum qui dicunt, & eorum qui audiunt. Hæc Cicero. Nunc nostrum poëtam audiamus omnia hæc fusius tradentem. Agit enim primò de decoro uerborum, id est, pedum siue carminum. deinde de re ipsa: hoc est Tragœdia & Comœdia. Postea de personis, & eorum ætatibus.

Res gestæ regum. Non omnia inquit, eodem carminis genere sunt celebranda: indecorū enim fuerit Lyricis carminibus bellum Troianum exarare. Quare res gestæ regum & horrida bella heroico

heroico carmine celebrari debent: quod satis Homeri poësis ostendit. Elegiaco carmine primum querelæ tantum scribebantur: unde Elegum dicitur. i. flebile. Postea tamē res lætas est complexū, & amores. Huius carminis inuentor incertus est: quanuis Terentianus Maurus Callinoum dicat. Iambico carmine scriptæ sunt imprecationes: inuentor fuit Archilocus. Id enim sentit Horatius quum dixit (proprio.) Scribuntur hoc pede Tragicæ & Comicæ: quia maximè aptus est alternis sermonibus, id est, interrogationibus & responsionibus, ut inquit Arist. Et Cic. in Orat. perfectio. In poët. Magnam (inquit) partem ex Iambis nostra cōstat oratio. Natus est etiam rebus agendis, id est, tractandis. Vnde in actus diuiditur Comædia. Lyrico uersu referuntur hymni, encomia, & Olympica certamina, in quibus Pindarus pugiles celebrat, & reges & quis uincentes: referuntur & amores iuuenum, & libera conuiuia.

Descriptas seruare. Indignatur Horatius, & in illos inuehitur qui se putant poëtæ, si uersum claudere didicerint: quasi eodem carmine scribatur Comædia, quo Tragicæ. An non ita est? nonne iisdem iambis, iisdem trimetris, eadem denique lege metimur carmen Comicæ & Tragicæ?

H Vc

D E A R T E

Verum est: sed in decoro maxima est differentia: nam senarius comicus non ferè differt à sermone populari & communi. Senarius Tragicus figuris & tropis, historijs, fabulis, similibus est repletus. Exempla ponit Horatius: Versibus (inquit) exponi tragicis res comica non uult. Expende hoc carmen exametrum, quàm longe absit à maiestate carminis, nihil habet poësis præter pedes: Comicis deniq; uerbis & popularibus, & minutis est compositum. Præterea uno uersu absoluit rē Comicam. Attende duo sequentia, quàm Tragica, quàm tropis & figuris ornata. Indignatur item &c. Quauis aliquando contingat, ut decorum ita postulet, ut Comœdia attollatur, Tragœdia deprimatur. Attende quibus uerbis id dicat Horatius, & quomodo duobus uersibus cisq; paulū ornatioribus de comœdia loquatur: & tragœdiam uno uersiculo absoluat. Subdit nihilominus utriusque partis exemplum: Nā quomodo Comœdia uocem tollat, declarauit exemplo irati Chremetis: quo uerò pacto Tragœdia se gerat submissius, exemplo Telephi & Pelei, qui cū essent à patria terra exules, & pauperes, in Tragœdia inducebātur humili sermone utentes, & ampla magnificaq; uerba proijcientes. i. abijcientes. Nā si aliter indu=

inducerentur, riderent auditores, aut dormitarēt,
supinam poëtae negligentiam notantes, qui deco-
rum personarum non animaduernerit.

Q V I N T V M P R A E C E P T V M.

De motu animorum.

Non satis est pulchra esse. &c. Hoc præceptū
pendet à superiore: adhuc enim de decoro
personarum seruādo agit: sed quia insuper tria
uidenda sunt poëtae, ut doceat, moueat, & delectet:
agit nūc de præcipua illa parte, quæ posita est in
motu animorum. Nam ceteræ partes hanc comi-
tantur: docere enim siue probare necessitatis est,
delectare suauitatis, flectere uictoriæ. Qui igitur In Orat.
permouendi præcepta tradit, reliquarum tradit.
Hoc uerè est quod tradi arte non posse dicebat
Roscius. Nihilominus tamen utilissimas admoni-
tiones Horatij audiamus. Prima est: Si uis alios
ad letitiam, dolorem, iram, misericordiam, & ad
alios huiusmodi affectus pertrahere: teipsū prius
ijsdem moue. Hoc præceptum non minus ad poë-
tam ipsū, qui scribit: quàm ad actores siue hi-
striones pertinet. Vnde legimus AEsopum il-
lum celebrem histrionem, cum Atreum ageret,

D E A R T E

ita ira excanduisse, ut sceptro percussus ministrum interfecerit. Hoc sibi præceptum falso tribuit Quintilianus, ut diximus cum de epilogo egimus. Secunda admonitio. Intuendæ sunt personæ dignitates, ut seruus, dominus: ætates, ut senex, iuuenis: sexus, ut matrona, nutrix: officia, ut mercator, actor: nationes, ut Colchus, Assyrius: patriæ, ut Thebanus, Argiuis. Si uerò quæras quomodo in his te debeas gerere: quidue faciendum, postquam hæc consideraueris: ipse tibi demonstrat Horatius, qui non solum quid faciendum: sed quomodo id fiat ostendit. Considera, inquam, epitheta quæ in præcipiendo apposuit, & regulam habebis breuem quidem illam, sed magni momenti. Senex, inquit, depingendus est maturus, iuuenis feruidus, matrona potens, sedula nutrix. &c. Tertia præclara & à paucis intellecta admonitio. Aut scribis res notas & ab alijs celebratas, aut nouam & inuisam arripis scribendi materiam. Si notam rem scribis, famam sequere: non enim licebit tibi à fama discedere, nec Polyphenum, aut Achillem, aliter quàm ab Homero depinguntur, fas erit tibi depingere: nec Medeam nisi ferocem & inuictam: &c. sin autem noua scribis, sibi conuenientia finge: hoc est, seruetur ad inum res illa qualis ab
incepto

incepto processerit, & sibi constet. Deniq; in rebus iam notis standum est alieno decoro: in nostris uerò standum est naturæ & philosophiæ rationibus. Id quomodo possis assequi, statim aperiet: nunc ex ipsa re quæstionem natam, prius dissoluit: in qua quæri solet: Maior ne laus & fama nobis accrescat ex publica materia, quàm ex nostra & nuper inuenta. Quæstionem breuiter absoluit, inquiens: Quemadmodum difficilius est publicam materiam propriè dicere (quia omnibus ex æquo est proposita, & plures habent iudices) ita potior laus & maior sequitur poëtam, si res cōmunes sibi facit proprias, quàm si primus indicta proferret. Et rectius. i. melius & cum maiore laude ex historia HomERICA compones Tragœdiam, quàm si nouam tuteipse excogitasses.

Publica materies. &c. Nunc exequitur præcepta quæ seruanda sunt illi, qui publicā materiā conatur efficere suam. Primum ne moretur in periodis uilibus, periodū uocat orbē: deinde ne sit fīdus interpretes, cuius officiū est uerbū uerbo reddere: aliqua etiā prætermittantur, quæ si cantare coneris, aut turbabunt ordinē, aut sibi pugnabunt: deniq; te arctatū & implicatū cernent qui nouerūt historiam: nec incipies inflatus ut scriptor ille Cy-

D E A R T E

clicus: Fortunam Priami cantabo. &c. Nā qui sic incipit, maiora promittit, quod si postea non præstat, ridebitur. Ex hoc loco, quidam ineptissimè reprehendūt Lucanū, Bella per Emathios: Siliū Italicū, Ordior arma, quibus: Statiū, Magnanimum AEacidē formidatamq; Tonāti Progeniē. Quasi uerò uetet Horatius à magnis principijs exordiri, si totū opus cōsonet principio. Sed illos taxat qui magna pollicētur, & nihil ostendunt. Id quod appositissimo declarauit exemplo: Parturiunt mōtes nascetur ridiculus mus. in quo uersu adhuc notabis, primā partem grauib; compositam uerbis magnū quid enunciare: secundā ita paulatim decrescere, ut in unam dictionē monosyllabā desinat, epitheto etiā appposito ex gracilib; literis. i. & u. Hec omnia præcepta quomodo seruari Home. demonstrat, qui bellū Troianū & Vlyssis historiā à multis decātata & in ore omniū posita, propria & sua effecerit, ut scriptor belli Troiani dicatur, quum plures belli Troiani extiterint scriptores.

Tu quid ego & populus. &c. Secundā partem aggreditur, cum ex nobis aliquid gignimus, In hac parte, inquit, non standum est famæ, sed ex morali philosophia eruenda præcepta: quæ tibi omnia collecta proponit Horatius plenius ac melius

lius Chrysippo & Crantore. Maximè tui operis, ait, decorum seruabis, si ætates cuiusq; personæ loquentis considerabis. Hæc omnia plana sunt, solum adnotabo in senū ætate, malè intelligi à Laurentio Valla uersiculum illum, Laudator temporis acti se puero. non enim ordinandum est, laudator se puero, sed acti temporis se puero.

SEXTVM PRAECEPTVM.

De rerum decoro: uel de Comædia

& Tragædia, & ipsarum partibus.

NEc hoc præceptū aliud est à quarto, diximus enim decorum uersari circa personas et res: sed perspicuitatis gratia separamus, simul quia Horatius ad Tragædias & Comædias totū se cōuertit. Aut agitur ergo res in scenis, aut acta refertur. Hæc distinctio huc spectat, ut quæ optima credideris in actione, minimè narrentur esse facta, sed agantur palam: nā quæ uidemus, ualidiùs mentem excitant, quàm quæ audimus. Quædam tamen etiam si sint admirabilia, potiùs narranda sunt, quàm in theatris peragenda. Circa hoc decorum reprehensus fuit Euripedes (ut ait Aristot.) In poët.

D E A R T E

quòd Medeam in theatro fecerit filios suos trucidantem. deniq; nefaria aut incredibilia non oculis, sed auribus obijciantur.

Ibidem.

Nunc minor quinto. Quoniam Tragedia (ut ait Arist.) actio est unius solis, uel paulò plus minusue: in quinque actus uidetur propriè posse distribui, ut temporis seruetur decorum. Nec Deus inter sit, nisi magnoperè causa postulet: nec quatuor personæ simul loquantur: quod & si sæpè facit Terentius, ita tamen ordinat sermonis seriem, ut nihil sit impeditenti, aut confusionis: nam si tres loquantur, quarta ex occulto sola loquitur: et loquentium sermones aucupatur.

Autoris partes chorus. Nunc illa Horatius aggredditur, quæ aut sunt ex fabula, aut fabulæ partes: ut chorus, tibiæ, tibicen, episodia, siue Satyri.

Chorus, inquit, autoris partes defendat, id est, aliquando in autoris laudem secedat, non enim ex ipsa fabula constat chorus, sed ex his qui extra fabulam sunt, ut populus, aut nymphæ, aut aliquid simile. Defendat officium uirile, hoc est, in uirtutis laudem sit multus. Officium uirile, quid sit, uideo à multis ignorari: nihil aliud tamen est Ari-

Eth. 1. ca. 7 stoteli, quàm uirtus ipsa.

Tibia in fabulis antiquis tenuis erat, paucisq;
prædita

prædita foraminibus: sed postquam creuit populus, & tibiæ, et tiliarum ornamenta sunt adaucta. Maior enim populus, & qui minus attentus quam antea conueniebat, propter diurnas comessationes, maiore tibia erat excitandus.

Tibicen qui antè sedens canebat, postea cœpit Scenicis uestibus ornari, & per theatrum syrna trahens spaciari.

Carmina quæ antea à Musicis canebantur, cōmunia erant, & popularia: postea adeò res redijt, ut cum Delphicis oraculis concertarent, adeò eloquentiam & diuinam sententiam redolebant.

Carmine qui Tragico. &c. Agit tandem Horatius de Episodijs ut uocat Arist. quos hîc uocat Satyros. Locus hic est obscurissimus, & à nemine hætenus (quod sciam) animaduersus. Episodium, est (ut ait Suidas) id quod inducitur & adijcitur præter legitimam fabulam risus gratia. hoc uocat Horatius Satyros, uel Faunos, uel Silenos. Hispani uocamus, Entremeses, quod inter medias actiones irrepant. Vnde igitur hæc Episodia ortū habuerint, declarat, inquiens: Poëtæ tragici, etiam si graues sint & asperi, tentauerunt an risum posset elicere salua tragica grauitate: quare Satyros nudauerunt. i. inuerecūda induxerūt Episodia,

H s quia

D E A R T E

quia functus sacris auditor, & benè potus, et sinè lege & ordine sedens, erat iocis & aliqua nouitate detinendus. Verùm ita risores. . &c. Satyri in Tragœdia risus ciendi gratia quauis inducantur, mœmineris tamen te Tragœdiam agere, et ita risum attemperādum esse, ut Tragœdiam deceat. Nā quid magis indecorū, quā si rex aliquis aut heros pulcherrimis & regalibus cōspectus uestibus, subitò uiliissimū dicendi genus arripiat? aut cōtrā ne uideatur humili sermone uti, ita infletur, ut nubes trāscendere uideatur? Tragœdia denique inter proteruos satyros paulū intersit pudibūda, similis matronæ graui, quæ festis diebus aliquādo cogitur choreas ducere. Nō ego inorn. Quo stylo cōponenda sint episodia docet. Scio, inquit, mōris esse, ut Satyri scribātur uerbis inornatis. i. cōmunibus: & dominātibus. i. propriè unamquamq; rē, etiam obscœnā, enuntiantibus: Sed ego non solum his ero contentus uerbis proprijs & significantibus: nec solum illud obseruabo, ut Silenus in Satyra multum distet ab ancillula proteruula & audaci, quæ est in Comoedia: Hæc enim obseruanda sunt: sed non solum (inquam) his ero contentus: sed ex notis & communibus uerbis tale texam carmen, quale quisq; se posse præstare credat: cum tamen

id experiatur, frustra crit, ludetq; operam. Nā, ut diximus, callida iunctura tritorum uerborum tantum potest, ut noua & inaudita uidearis efferre. Satyri deniq; in Tragœdia nec sint nimiam lasciu, nec obscœni & spurci: nam offenduntur equites, qui spectant Tragœdiam, & reliqui homines, etiam uiles, nec probant, nec præmio dignum iudicant poëtam. Vide adag. Ciceris emptor.

His sex præceptis, aut uerius, quatuor, complexus est Horatius quicquid ad perfectionem poëseos spectare poterant. Nunc aliquas prosequitur quæstiones quæ ab illis præceptis pendent: quas in hunc locum distulit, ne præceptorum turbaret claritatem. Nam qui præcipit, breuis esse debet.

P O E T A E N E G R A E C I A N

Latini fuerint diligentiores.

Syllaba longa breui subiecta. &c. Fabulae consistat ex pedibus iābis, iābus ex syllaba breui & longa, unde fit, ut sit citus. uersus tragici dicuntur trimetri, cum constent ex sex pedibus. Cur ita? Quia propter celcritatem etiam si sex sint pedes, tres tantum percussiones habet (Compases uulgò dicimus). Verba Quintiliani sunt: Sex enim pedes tres
lib. 9. ca. 4
per-

D E A R T E

percussiones habent. Trimeter uerò apud Græcos ex pedibus sex omnibus iambis constabat, sed non ita pridem. i. dudum, accepit stabiles spōdæcos: sed non in secunda aut quarta sede socialiter. i. in secunda & quarta semper erit iambus. Hunc pedem & hanc legem nec Accius nec Ennius in suis tragœdijs seruauerūt. Quid ergo agit uterq;? Mittit in Scenam uersus quidem sonoros, sed properatos, & carentes cura & lima, atque ita premit. i. cudit & uix exprimit, ut appareat ignorasse artem. Et quod peius est, sic se defendit. Quis est aut quotusquisq; qui inter agendum possit iudicare legitimus ne sit iambus nec ne? Præcipue cùm Romanis poëtis hæc indigna sit concessa uenia? Ah, quanto rectius esset, si poëta cùm carmen condit, uisuros cunctos crederet peccata quæ committat. Hoc uitare culpam est, non laudem mereri. Quid igitur agendum? Euolue poëtas Græcos, ad illorumq; normam tua scripta dirige. Nā qui Plautum conatur imitari, nec uersus faciet, nec iocos homine docto dignos unquam profceret.

V N D E O R T V M H A B V E
rint fabulæ: & quis quæque
in his inuenerit.

Ignotum

I Gnotum Tragicæ. Theſpis poëta primum inue-
nit tragœdiam, actoresq; pluſtris circumuehe-
bat ſecibus perunctos, ne agnoſceretur. AEſchy-
lus tragicus inuenit perſonas quibus actorū obtege-
ret uultus, & agere inſtituit in theatris, idēq; grā
diloquentiā, & cothurnos inuenit. Poſtea in-
uenta eſt Comœdia uetus, quæ maxima cum liber-
tate notabat prauos ciuium mores. ſed hæc licen-
tia lege cohibita eſt, & chori ſublati ſunt. Hæc de
Græcis. Latini autem omnia cum laude tentarūt.
nec minus clari fuiſſet lingua quàm armis, ſi quæ
ſcribebant, uoluſſent limare: poëma uerò niſi ſæ-
pius caſtigetur, reſprehenſione non carebit.

V T R V M I N G E N I V M

an ars plus in carmine con-
dendo ualeat.

I Ngenium miſera. Dicebat Democritus poëtas
non fieri, ſed gigni, quare ingenium ſiue natura
& furor ille inſitus efficit poëtam, non ars. Hanc
quæſtionem paulò poſt diſſoluit Horatius: nunc ir-
ridet illos, qui huic Democriti dicto adherentes,
nec unguis, nec capillos, nec barbam abſcindunt:
& ſecreta loca petunt: & balnea uitant: quaſi il-
lud

D E A R T E

Iud sit quod poëtam possit efficere. Addit ridens: ô me dementem, qui quotânis bilem purgo, & munitijs indulgeo. quod si non fecissem, iam in celeberrimam poëtam euasissem. Sed quando hac nō succēssit, ero præceptor poëtarū: et, quid optimū efficiat poëtam, ipse nihil scribens, docebo. Proponit autem se dicturum quod in his carminibus sequētibz cōtinetur: quod cū expleuerit, finiet artē.

Vnde parentur opes:

Quid alat formetq; poëtam:

Quid deceat, quid non:

Quò uirtus, quò ferat error.

HAEC est materia dicendorū usq; ad finē librī,
Vnde parentur opes egregiè docet inquit: Scribendi rectè sapere est, & principium, et fons. Quasi dicat, sine sapientia, sine philosophia, inane est quicquid scribis. Rē tibi Socratica. Admonuimus superius ex Quint. cōstare orationē ex rebus et uerbis. Et Cicero in partitionibus uim oratoris in rebus & uerbis esse dixit. Idem in calce secundi de Oratore: Verba igitur, inquit Crassus, mihi reliquit Antonius, rem ipse sumpsit. Et noster Horatius in principio artis: Cui lecta, inquit, potenter erit res. & infrā: In uerbis etiam tenuis cautusq; ferendis. Eodem ergo pacto in hac parte inquit:

inquit. Cum ex rebus et uerbis constet oratio: Res ab ipsa philosophia sunt petendæ, & à Socratica doctrina: Nam sine philosophia nullus extitit unquam poëta. Quam si rectè calluerit, de uerborum inuentione iubebo illum esse quietum, aut saltem non sollicitum. Nā qui didicit quid debeat patriæ, quo amore parentes, quo amici, quo hospites amādi, & cætera quæ adiecit Horatius: non multū laborabit in inueniēdis proprijs cuiusq; rei nomini bus: Verba nanq; facile sequuntur rē præuisam. Hæc aliquanto longius congeſsi, ut intelligamus quid uoluerit Persius in tota prima Satyra: qui reprehendit scriptores qui repente poëtae sunt effecti, qui cum uersus inopes rerum nugæq; canoras effutirēt, se perfectos poëtas existimabant. Quare meritò incipit exclamando: ô quantū est in rebus inane! in rebus inquam, nō in uerbis, nam Pædius crimina rasis librat in antithetis, doctus posuisse figuras. Deniq; quauis uerba sint lectissima, uersusq; politissimi, non carent acerrima reprehensione: quia ut inquit Cicero: Si res nō subest ab oratore percepta & cognita, aut nulla sit oratio neceſſe est, aut omniū irrisione ludatur. Quid est enim tā furiosum, quàm uerborum uel optimorum atq; ornatissimorum sonitus inanis, nulla subiecta

Orat. 1
senten-

D E A R T E

sententia, neq; scientia. Hæc ille, quæ omnia optimè declarant scopū Persij in tota prima Satyra.

Graijs ingenium. Secundam partem aggreditur, quid formet poëtam. à qua breuiter sese expedit: Si Græcos inquiring, poëtas imiteris, qui nullius rei auari sunt, præterquam gloria. Nam Romani rebus familiaribus intenti, perpetua carmina & æterna quomodo component?

Aut prodesse uolunt. Tertia hæc pars est, de decoro, nō de eo quod superius dictum est, nā tunc de decoro seruando in rebus & personis egit, sed quid deceat ipsos poëtas: quidq; ipsis conueniat. Exemplis res fiet illustrior. Tria sunt genera poëtarū: uel potius tres sunt scopi poëtarum. Quidam uolunt prodesse tantum, ut Theognis apud Græcos, apud nostros Cato ille qui circumfertur. Quidam delectare tantum, ut Ouidius in Metamor. Quidam uerò utrumq; ut Homerus & Virg. hoc genus longè cæteris antestat: hi poëtæ sunt qui leguntur, & uiuunt æternum. In quibus si fortè sit aliqua incuria, ignoscendum est, nam & peritissimi sagittatores aliquando aberrant ab scopo, & doctissimi musici dissonantiam efficiunt. At cōtrā ut librarius. i. librorum scriptor, si sæpius peccet, uenia caret; & citharædus qui semper eadem oberrat

errat chorda ridetur & exploditur: sic poëta, qui
semper eodem reuertitur, comparatur Choëri-
lo pessimo poëtæ, quæ si bis aut ter aliquid acutè pro-
tulit, miror: quemadmodum etiam indignor quo-
ties egregius poëta Homerus dormitat. Nota-
bis autem quomodo explanaucrim uersiculum cõ-
tra omnium opinionem. Nam dictio (quãdoque)
apud Horatium semper pro(quotiescunq;) acci-
pitur. Vide Odam primam & secundam quarti
carminum. Expone igitur alia disputatione, sic:
quemadmodum pessimum poëtam miror, quando
bis aut ter bonus est, ita indignor quotiescunq; bo-
nus dormitat Homerus. Præterea decet consi-
derare in rebus omnibus tolerabilem esse medio-
critatem, non autem in poësi, quæ nisi fuerit opti-
ma, contemnitur. Causam reddit Cicero in fine
primi de Orat. A quibus, inquit, nihil præter uolu-
ptatem aurium quæritur, in ijs offenditur, simul
atq; imminuitur aliquid de uoluptate. Et ipse met
Horatius egregia hoc probat similitudine. Cum ta-
men hæc ita sese habeât, ut in rebus cæteris sit me-
diocrè laudandum, & poëta non nisi optimus
probetur: tamen omnes audent uersus fingere, &
indignum putant, si poësin ignorent, cum cætera-
rum rerum se esse rudes dicere non erubescant: ne

D E A R T E

rideantur ab astantium corona. Expedit etiam
poëtae ut emendet quae scripserit, & doctis etiam
tradat emendanda. Deinde ne praecipitet opus, sed
domi per multos annos retineat, quia domi subiti-
de corrigitur, at postquam euolauit, nescit uox
missa reuerti. Hoc ego praceptum seruare posse
optarē: qui tribus non amplius diebus haec raptim
& properanter scripsi, tot interim lectionibus
publicis impeditus, & domesticis etiam occupatio-
nibus detentus. Nunc huic parti coronidem addit
Horatius de praestantia & antiquitate artis poë-
ticae disputans: quod non alia causa facit, quam ut
ad rem praecelaram excitet iuuenum animos: &
tot pracepta ne pertimeant subire, quandoquidem
ars ipsa praestantia sua his & maximis alijs sudo-
ribus non sit indigna.

Natura fieret. Vltimū hoc est quod proposuit:
quò uirtus & ars nos ducat, quòue error et artis
ignorantia. Locus hic aptus est ad discutiendam
questionem illam: plūsne ingenium ualeat an ars,
quam questionem prius tetigit, nec soluit. Hic au-
tem differendum est de praestantia artis, & de ig-
norantiae malis. Respondet itaq;: Nec artem sine
natura, nec naturam siue ingenium sine doctrina
quicquā proficere affirmo: ambo praecipua sunt,

& in

& inter se connexa. Sed si liberè sentiendum est:
 qui studet optatam metam consequi, à teneris un-
 guiculis industria, laboribus, uigilijs se maceret
 oportet. Nam si in Olympijs non accipit coronā,
 nisi qui multa tulit, nisi qui ab ipsa infantia se ex-
 ercuit, nisi qui Venere & uino abstinuit: Et si cā-
 tores, ut in Pythijs ludis excellent, non nisi pluri-
 mis laboribus & industria id assequuntur: quor-
 sum tu in arte omnium præclarissima sine doctri-
 na, labore, sudore, sed solo ingenio & natura uis
 egregius haberi? Aspice rursus qui ingenio fre-
 tus tibi poëta uideris, quot te sequantur incōmo-
 da. Primum quoniam tuteipsum fallis, omnes te
 decipiunt. Nam scis comitem horridū (ut ait Per-
 sius) trita donare lacerna, scis spondere leui pro
 paupere, & eripere atris litibus, deinde tradis illi
 carmina emendanda: Et uerum, inquis, amo: uerū
 mihi dicito deme. Ille quid? Laudabit & in cœlum
 tollet, tundet pede terram, deniq; derisor plus quā
 laudator uerus mouetur. Multo sapientius magna-
 tes agunt, quum aliquem uolunt probare, an sit
 amicitia dignus: torquent enim uino: & ita inte-
 riores omnes cogitationes scrutantur: iuxta pro-
 uerbum: In uino ueritas. Qui aduersus factos
 ueros iudices uult adhibere, similes eligat Quinti

D E A R T E .

lio qui nullo habito personarum respectu , uitia notabat, quæ si defendere conarère , te missum cū tuis carminibus faciebat. Hinc arrepta occasione Horatius describit nobis optimum carminū emendatorem. Vt mala quem scab . Hoc aliud malum est, quod inscios comitatur poëtas . Nam sicut scabiosos & phanaticos solemus fugitare: ita qui sapiunt uesanū poëtā auersantur, præterea exagitantur à pueris, & fit uulgi fabula: nec iā uult seruari, & ad meliorem mentem reduci: erroresq; suos diligit. ueluti qui in puteū decidit, nec si quis demittere funem curet, ipse seruari uelit. Quem admodum Agrigentinus Empedocles philosophus & poëta dum Siculos suam mortem uoluit celare ut pro Deo coleretur, sese in Aetnam præcipit: Pereant percant fanatici poëtæ, quando & uolūt ipsi perire: nō sit qui, quo minus id faciant, obstet: nam inuitū qui seruat, idem facit occidendi . Hic uersiculus non parum torquet eruditos, nonnullos etiam grammaticos: at uerò si consideres Horatium aliquando ex Græcis plurimas loquendi formulas arripuisse, nullus hinc scrupulus remanebit . Hoc nomen (idem) apud Græcos aptè iungitur datiuīs. ut si dicas habeo idem nomen regi: hoc est, habeo idem nomen cum rege . Vfus est &

est & Lucret. hac loquēdi formula lib. 3. in calce.
 Adde Heliconiadū comites: quorū unus Homerus
 Sceptra potitus, eadem alijs sopitus quiete est.
 Et Ovidius in Ibin.

Vtq; duobus idem dictis modò nomen habenti.
 Sententiam uerò Horatianam expressit clarius
 Seneca in Thebaide inquiens:
 Occidere est, uetare cupientem mori.

F I N I S.

IN OBITVM D. IOANNÆ
 Castellæ, Aragoniæ, Legionisq;
 Reginæ. Francisci Sanctij
 epitaphius.

Hesperix Regina plagæ peto sidera tandem,
 Impleui postquam regibus omne solum.
 Namq; si in occiduis defigas lumina regnis,
 Qua subit Oceanum diuitis unda Tagi:
 Inuenies illic quæ Seras frænet & Indos,
 Et quæ Gangaridis det piâ iura uiris.
 Siue etiam spectes Borcam, septemq; Triones,
 Hic quoq; chare nepos iura Philippe tencs.

Nec procul hinc triplici exultat quæ Gallia regnos
Lata fuit nostræ prolis habere ducem.
Romanis, Hunnisq; simul clara indole regem:
Et dedimus Regem terra Bohæma tibi.
Extremos hominum Morinos mea filia ducit,
Qua pulsas Scythicas Rhene bicornis aquas.
Et qui Romulidis quondam dare iura parabas
Cimbres, caput proli subdis inermis meæ.
Quid iam parua loquor? summi orbi nonne Monarchæ
Tæpora cui cingit terna corona, dedi? (Chen,
Qui duras Arabum gentes, Turcasq; rebelles
Contudit, ut Christi floreat alma fides.
Ausus et Herculeas metas diuellere, pontum
Per medium ducit, quò noua regna petat.
Nec prius inuentis statuit finemq; modumq;
Quàm subitè posset cernere Gangis opes.
Sic natos uidi Reges, Regesq; nepotes,
Et Reges horum pignora grata simul.
Fœcundo postquam compleui germine terras,
Auctura Indigetes summa per astra uchor.

EIVSDEM, DE IYDAEA VO-
ratura filium in obsidione Hierusalem.

Dum uariæ in dubio rixantur pectore curæ,
Concurruntq; pares hinc amor, inde fames:
Infelix

*Infelix Hebræa parens, miserabile, dixit
Infanti lachrymans tristia uerba suo.
Heu malè nate puer, reddes mihi sāguinis haustus,
Quæq; tibi tribui, lactea membra dabis.
Fata iubent: genitrix, quauis natura repugnet,
Ex me prognato corpori ero tumulus.*

*EIVSDEM DE PHILO-
mela. ex Græco.*

*Præpetibus pennis uento bacchante ferebar
Per mare Bistonio, qui mihi sæuus erat.
Sed me dulcissimam suscepit ædona curuo
Pontiuagus delphin corpore, piscis auem.
Quæ fido tranans spaciosum remige pontum,
Mulcebam uarijs corda marina sonis.
Delphini Musas nauulo sine sæpè tulerunt,
Nam neq; Arionis fabula falsa fuit.*

E R R A T A.

*Fol. 9. pag. 1. uer. 12. raptauerat. Ibid. p. 2. u. 11. loco
fol. 10. p. 1. u. 14. uincire. fol. 12. p. 1. u. 9. quia. fol. 13
p. 2. u. 6. accusantur. fol. 15. p. 2. u. 8. aut ad. fol. 18.
p. 2. u. 10. euenturum. fo. 23. p. 1. u. 21. uirtuti. fol. 24.
p. 2. u. 2. manum. fol. 31. p. 1. u. 22. perceptio. fol. 35
p. 1. u. 15. Primus est. Ibidem. p. 2. u. 18. effici. fo. 43
p. 1. u. 22. solent. fol. 44. p. 1. u. 15. oratore. fol. 46.
p. 2. u. 4. libidines. fol. 64. p. 2. u. 22. Sagittarij.*

